

NTANGU YA KUVUKANA MPE KIDIMBU YA YAWU



Mbote. Ya kele mbote na kuvwanda awa na nkokila yayi, mpe kutelama na kisika yayi.

² Munu, na suka yayi, na kukwisaka na nzila . . . Mu kwendaka na kusambila, mu vwandaka vingila na Mfumu. Mpe na kukwisaka na nzila, mu zibulaka radio samu na kuwa longi yina ke lutaka na radio, Mpangi Smith, mpangi-bakala ya ndombe (beno nionso me kuwa yandi na suka yayi? Muntu mosi na kati ya beno?) kuna, mu banza ya ke Ohio. Muntu mosi vwandaka tubila munu samu na malongi ya yandi, mpe yandi tubaka, “Nge fwana kuwa yandi,” mutindu yina.

³ Na mbala mosi mu me kubwa na yandi, na suka yayi. Mpe kieleka yandi vwandaka zonzila na mutindu disumu kele na kusalaka na bunene na kati ya yinza bubu yayi, mpe yandi vwandaka . . . Mpe mu me luta mwa ntama diaka, na radio yankaka, mpe mu vwandaka kuwa muntu yankaka. Ntangu mu kumaka awa, na kutala mu vwandaka ya kukubama, mu vwandaka kukiyufula kana ntangu lutaka ve samu na kukwisa na yinzo-Nzambi, na suka yayi ntangu mu kwisaka. Na yawu, kieleka ya kele mbote mingi na beto na kuvwanda awa na nkokila yayi, mpe samu na kusala na ksalu ya Mfumu.

⁴ Mpe na kuzonzaka na yina me tala Mpangi Neville, na nsangu ya kilumbu yankaka yina, na mwa mama yayi, mpangi ya beto ya kento yina ntama ve vwandaka me bika beto. Ya vwandaka, beto nionso zaba nani ya vwandaka, ya vwandaka Mpangi-kento Weaver. Mpe dibanza ya munu ke na kwenda na bakala awa, yina ke kuzwa mbotika na nkokila yayi; mpangi-kento . . . mu botikaka yandi na baptistere ntangu mu . . . ya lungaka ti bawu kunata yandi awa na kiti ya bambevo. Yandi vwanda kufwa, na cancer, mpe kaka nkokila yina bikalaka na yandi na kuzinga; badokotolo bikaka yandi, yandi zolaka kufwa na suka yina vwandaka landa. Mpe mu kwendaka na yinzo ya yandi mpe mekaka na kuzonzila yandi na yina me tala kubeluka ya Kinzambi, mpe yandi vwandaka landila na kuzonza, “Mu kele ya kulunga ve ti nge kwisa na muludi ya munu.” Yandi tubaka, “Mu—mu kele ya kulunga ve samu longi kuvwanda na yinzo ya munu.” Yandi tubaka, “Mu kele nsumuki.” Kasi yandi tubaka, “Tata, mu zola kufwa mutindu yayi ve.” Mpe na yawu Grace Weber, ntama ve na awa, nataka munu kuna. Mu vwandaka me kuma kaka, ya kulemba samu na balukutakanu; mpe kuna na yina mu vwandaka sambila samu na yandi, mpe tangilaka yandi

Masonuku, mpe yandi vulukaka. Na manima, yandi vwandaka nangula diboko na mpasi, kasi yandi vwandaka zola kupesa maboko na muntu nionso. Yandi kaka. . . kima mosi salamaka na yandi.

⁵ Mpe na yina bawu vwandaka pesa maboko, mu monaka vision ya yandi yina vwandaka kwenda na yinzo ya bansusu, ya vwandaka vutuka. Mu tubaka, “Mbote, nionso ke vwanda mbote ntangu yayi”; mpe ya salamaka bamvula kumi na nana me luta. Mpe ntangu nionso, yandi vwandaka zinga na ntwala ya cancer yango. Kana yandi kufwaka. . . Ata mbala mosi ve ti yandi kufwaka na cancer, ntima kangamaka yandi mpe yandi kufwaka. Ba tulaka yandi na oxygene; yandi kufwaka samu ti ntima kukangamaka.

⁶ Mpe kuna mu vwandaka banza, kaka na nsuka ntangu bantu vwandaka basika, mpe bawu vwandaka yimba, *Na Yawu Yesu Kwisaka*. Kieleka ya kele yina salamaka, Yandi kwisaka mpe pesaka yandi luzingu bamvula kumi na nana yina. Mpe mu vwandaka banza, “Mutindu ya kele ya kulunga.” Kento yango mu banza vwandaka zaba ve ti yandi vwandaka sala mutindu yina. Kuna, diaka, keba ve ti yandi zabaka. Kasi mutindu ya kulunga ya vwandaka na kuzwa ndambu yango kuna, *Na Yawu Yesu Kwisaka*.

⁷ Ntangu yayi ya kele kaka ntete, mu—mu banza, ndandani ya nene ya balukutakanu ya munu. Mu ke na kidi-kidi mingi. Na suka yayi, mu vwandaka ya kidi-kidi mingi, mu kwendaka samu na ku—kusambila. Mpe mu—mu me vutuka awa, na yinzo. Dikanda, mu me nata bawu na Arizona, mpe mu kele. . . samu ti bana kukwenda na lukolo. Mpe mu me vutuka awa samu kaka na ku—kuzwa mutindu ya kupema, kukwenda na kuzomba na Mpangi Wood mpe nkonga ya bankundi awa; samu na kukwenda kuzomba, lumingu yayi ke na kwisa. Beto ke kwenda na Kentucky. Mpe mu vwandaka. . . vwandaka na. . . Mu kwisaka kaka kilumbu yina—yina Mama Weaver kufwaka, mpe ya vwandaka mbote ti mu vwandaka awa samu na kusadisa Mpangi Neville na bisambu ya lufwa yango.

⁸ Mpe mu ke na kumekaka ve na. . . mu ke na kumekaka ve na ku—kutuba mingi na yina me tala yawu, beno zaba, na ntwala ya bantu yina ke bokutaka. Samu ti, mu banza ti, mosi ya kulutula mambu ya boma ya kele kumona bakala to kento yina ke bokutaka ntangu nionso. Mu ke banzaka ntangu nionso, “Nzambi, bumba munu na yawu.” Beno me mona, yawu—yawu ke lembisaka lukwikilu ntangu nionso, beno zaba. Beno fwana kaka—beno fwana kaka. . . kana beno—kana beno. . . Mu zaba ti na kukulaka mingi, mosi na mosi ya beto, mambu mpe mambu diaka ke salamaka na beto. Mpe mu zaba ti mwa bima yango ke landana na kubwelama, ntangu beno ke kulaka mingi, yawu ke salamaka kaka. Kasi mu banza ti mosi ya mambu ya kulutula boma, kele Satana kukanga luzingu ya muntu: kiboba ya bakala

to kiboba ya kento yina ke bokutaka ntangu nionso, beno me mona. Mu—mu banza kukuma kisika yina ve. Mu banza ti mu ke kuka na kukanga ntima na yawu, bizitu ya munu, mpe—mpe kukuma na kisika . . . mu zola ti luzingu ya munu kuvwanda ya kukangama na Nkembo ya Nzambi: na ntima ya yinda, na lutondo, na ngemba, na lembami ya Yandi, mpe kuvwanda ya kufuluka na Mpeve-Santu.

⁹ Mpe munu . . . mosi ya mambu ya munu ya ngudi yina ke salaka munu mpasi ntangu nionso na luzingu ya munu, ya kele mutindu ya kidi-kidi. Ya kele ti ntangu mu ke vwandaka ya kulemba mingi, kuna mu ke kumaka kieleka na ngolo ve. Mu ke kumaka . . . kutala mutindu ti muntu ve ke kipaka beno, beno zaba, mpe—mpe beno nionso ke . . . Beno mpe, ke kuzwaka yawu. Mpe kieleka ya ke vwandaka ya kulutila, beno zaba, mpe ya ke kumaka yimbi mingi ntangu yankaka, mpe na mpasi mu ke lendaka . . . Ya kele tension, mpe ya kele yawu yina ke salaka yawu. Mpe kuna mu ke kumaka na kisika yina bantangu mingi, kulutila na ba-vision mingi yayi, beno me mona, yawu ke bakaka kaka munu. Mu ke tala muntu, mu ke banza, “Yayi kele vision. Ve, ve, ve, ya kele yawu ve. Yinga! Ya kele yawu ve?” Beno me mona? Mpe beno zaba ve mpasi yina kele na yawu. Na yawu kuna—na yawu kuna beno—beno ke kukiyufula. Kuna beno ke banda na kubanza, “Mbote, nge kele . . .” Kuna beno ke kwenda na lweka mpe ke tuba, “Mbote, awa, yinki—yinki mu me sala? Munu yandi yayi, mu kele—mu kele na bamvula makumi tanu mpe mu me sala kima mosi ve samu na Mfumu; mpe mu—mu ke na kukumaka kiboba. Mpe yinki . . . ? Oh, la la.” Kuna beno ke baka kaka . . . yina beto vwandaka bokila “mawa.” Ndambu ya beno bankundi yina kele keba ve na mvula ya munu lendaka bambuka moyo na yina ba vwandaka bokilaka “kuvwanda na mawa.” Papa vwandaka tuba yawu mpe mu vwandaka kukiyufula yinki yandi vwandaka zola kutuba, mpe awa kieleka mu zaba yinki yandi vwandaka zola kutuba. Na yawu kuna, beno ke tala mutindu yina, ti ya kele na kieleka ata fioti ve; ya kele kaka beno, beno zaba yawu. Beno me mona, beno zaba yawu, ti ya kele kaka beno yina ke na kusalaka yawu.

¹⁰ Na yawu mu vwandaka meka na kukilembika mwa fioti awa, mpe kuyilama samu na kubenda ya nene yina mu banza yina ke na kwisa ntama mingi ve. Mpe kuna kuluta . . . Mu fwana kwenda na New York ntama mingi ve, mpe mu . . . na lukutakanu kuna, campagne mosi. Mpe na manima na Shreveport, mpe kuvutuka na Phoenix. Mpe kuna kukwisa na wesete . . . na ndilu ya sude ya États-Unis. Mpe kuna bawu ke na kukubikaka samu na bayinsi yankaka ntangu yayi, samu na kubanda kana beto lenda na manima ya ntete ya mvula, keba ve na Ngonda ya tatu, Ngonda ya yiya, kima ya mutindu yina; kubanda na Stockholm to na Oslo, mpe kuziyeta bisika nionso na yinza, kana beto lenda na nzietelo yayi yina ke na kwisa.

¹¹ Mpe ntangu yayi mu kele na yinzo, mutindu ya kupema mwa fioti, samu na kuzwa diaka ngolo. Mpe kana Mfumu zola, mu ke katuka na Kentucky, samu na kuvutuka awa Lumingu ke na kwisa. Mpe—mpe kana nionso vwanda mbote, ti Mfumu zola, mpe ti Mpangi Neville kutala yimbi ve; mbote, mu ke meka kwandi na kubaka kisalu Lumingu ke na kwisa, kana—kana Mfumu zola. Mpe kana Yandi zola mutindu Mpangi Neville, mu—mu ke vwanda awa. Yinga tata, Yandi kele mutindu. . . kana Yandi zola yawu mutindu Mpangi Neville. Mu banza ti Yandi zola. Ntangu yayi, beno me mona, na yina mu zaba ti munu ntama mingi ve, kana Mfumu zola, mu ke vwanda ntama na beno na mwa ntangu fioti.

¹² Mpe munu. . . kaka mwa bansangu ya fioti, mwa kima mosi yina mu me kuzwa na ntima ya munu, kuna mu—mu—mu me tala mutindu ti mu zola kuzonzila beno na yawu, beno me mona, mpe beto lenda kuwisana na yawu. Ntangu yayi, mu ke na mwa ndambu, tanu to sambanu yina me kwisa na munu na mwa bilumbu ya nsuka yina me luta. Mpe mu kwendaka, bilumbu zole awa, samu na kuzomba mpadi awa. Mpe mu ke kwendaka na mfinda, mpe mu ke bakaka na munu kilapi na mukanda. Beno me mona? Ntangu yayi ntangu mwini ke kumaka mbote na kilumbu, mu ke yekama na yiti kisika mosi. Kana mu lala ve, mu ke banda na kusambila, mpe kuna munu, Mfumu ke pesa munu kima, mu ke banda na kusonika mwa banoti ya yawu, beno me mona. Beno zaba yinki mu zola tuba; ntangu beno ke kumaka beno mosi, mpe kuna beno. . . Na manima ntangu mu ke kuma awa, mu ke sonika yawu nionso na kati ya calepin. Mpe kuna ntangu ba ke bokila munu, mu ke kwenda mbangu mpe ke kwenda baka calepin ya munu mpe mu ke tadidila yawu mpe mu ke mona na yina mu lendaka banda, beno me mona. Ya kele yina me salama kaka malu-malu yayi.

¹³ Na yawu ntangu yayi, mu zola, kana Mfumu zola, kuzonza kaka. . . Mu ke na kumekaka na kusala. . . kukumisa nkufi ya banene, bansangu ya yinda, beno me mona; bayina ke bakaka bangunga. Mpe Mfumu me sadisa munu na kusala kisalu mosi ya mbote ya nkufi na Chicago, nkokila yankaka yina kuna, na kutala baminuti makumi tatu. Mpe muntu mosi kwisa na munu, yandi tubaka, “Mu vwandaka banza ve ti nge lendaka sala yawu, kasi nge me sala yawu!” Na yawu baminuti makumi tatu, na kisika ya bangunga zole na ndambu, to bangunga tatu, beno zaba. Na yawu mu banza ti mu lendaka sala mbangu na nkokila yayi mpe kubanda mwa bangalasise, samu na kusimba beno ntangu mingi ve.

¹⁴ Nzambi kusakumuna beno. Ata bisika yina mu ke kwendaka, ata mbala mosi ve ti ya ke vwanda na kisika mutindu tabernacle yayi awa. Ya kele yinzo ya munu, yinzo ya munu ya mbote. Mpe mu ke mona mawa na dikanda Weaver. Mpe na mpangi-bakala ya ndombe ya ntalu yayi yina me kufwa, mu sambilaka na yandi

mwa ntangu fioti ntete yandi kufwa, mpe ya nkadulu ya mbote. Mpe yandi kele na Yinzoo na Nzambi ntangu yayi, mpe ya me manisa. Mpe na mutindu nionso beno ke kwenda kaka, mpe beto nionso zaba yawu. Na yawu beto kele. . . bika ti Mfumu kupemisa mioyo ya bawu na ngemba, mpe kilumbu mosi beto ke banza na kukutana na Ntoto kuna, kisika kimbevo, mawa, to lufwa kele ve. Tii kuna, bika beto kaka kusala nionso yina beto lenda samu na Nsangu ya mbote.

¹⁵ Na yina me tala tension, mu vwandaka sambila samu na yawu na suka yayi. Yinki beno lenda sala kana beno vwandaka na tension ve? Beno banza ntete na yawu. Tension kele na kisika na luzingu. Ya ke pesaka munu ngolo ntangu mu ke banzaka na yawu. Kana beno vwanza na tension ve, beno ke vwanza mutindu mwana ya popi ya bitende, beno ke vwanza na mitindu ya kutala ve. Ya ke vwanza na kima ve yina ke ningisa beno. Mutindu bakala na kento, mu banza kana yandi zola kusala kima, mpe ti bawu ke na kumekaka na kusala kintwadi (ya kulutula Baklisto), mpe ti yankaka yina zola. . . Mpe kuna ntangu beno ke vukana na. . . beno ke bakula yina yandi salaka; yandi ke bakula. . . Beno me mona, kieleka tension ke nata beno pene-pene ya mosi na mosi. Mpe muntu mosi ke tuba na beno ti, “Mbote,” yandi ke tuba, “banza ntete na mwa kento ya nge yina vwanza me luta na ba- tension mingi ntangu nge vwanza ya mbote mingi ve,” to “bakala ya nge yina vwanza me luta na mwa tension ntangu nge vwanza ya mbote mingi ve. Na manima ntangu yawu nionso ke vwanza ya kulemvoka, beno tala mutindu beno ke tala samu na yandi. Oh, la la, beno fwana. . .” Beno me mona, beno fwana kuzwa tension. Kaka yina.

¹⁶ Mpe beno banza ntete, na mitindu ya kutala, yinki kana beno vwanza na mutindu ya kutala ve, ata bampasi to kima ve? Yinki kana ya vwanza na ata mpasi ve? Beno zolaka vwanza na ata mosi ve ya mitindu ya kutala. Beno me mona? Mpe kana beno vwanza na ata mutindu ya kutala ya nzutu ve, kuna mosi ya bambakusulu ya beno zolaka vwanza diaka ve. Beno me mona? Na yawu, beno mona, nionso na kutala kele kaka ya kulunga. Na yawu, “Nzambi, pesa beto kaka lemvo samu na kutelama na ntwala ya yayi,” dyambu kele yina. Kana beto telama kaka na lemvo yina, mpe kutelama kuna mpe kutuba, “Beto zaba ti ntangu luzingu yayi ke suka, yina kele mbote kele lweka yankaka ya kele kisika yina beto zola kukwenda.” Mpe ntangu yayi, beto—beto ke bambuka moyo ti bima nionso yayi, kele tension.

¹⁷ Ti, bantu yankaka ke mekaka na kulakisa Kimuklisto, ti “beno ke vwanza diaka ve na bampasi. Beno ke. . .” Ve, beno ke kondwa yawu ve. “Beno ke kuzwa diaka ve tension.” Oh, ve! Beno ke bwela tension na yina beno ke kuma Muklisto, samu ti beno vwanza mutindu ya mu ke kipe ve, ya ntima na zulu ve,

ata yina zolaka salama kuna, beno vwandaka kipe ve yina beno vwandaka sala.

¹⁸ Kasi ntangu beno me kuma Muklisto ya kieleka, konso ntangu beno ke kumiyulaka, “Mu kele ya kulunga na ntwala ya Mfumu ya munu? Kana mu lendaka kuwa Yandi!” Yina ke kotisa beno na tension, yina ke nata beno na kusala keba. Ya kele yina ke sala beno yina beno kele. Na yawu na zulu ya nionso, tension kele lusakumunu. Ya kele kaka mutindu beno ke tadila yawu. Ya kele kaka mutindu beno ke tadila yawu. Beno me mona? Kana beno tala kaka lweka yankaka, ya ke—ya ke. . . Ata fioti beno lendaka zenga kitini, beno ke vwanda kaka na balweka zole na yawu, beno me mona. Na yawu beno fwana kumona balweka nionso zole.

¹⁹ Na yawu tension. . . Mu banza, “Oh, la la, ya kele. . . Yinki kele tension yayi? Kana mu butukaka ve kukondwa tension yayi.” Mbote, kana mu vwandaka ve na tension yayi, mu zolaka vwanda ve yina mu kele. Mu zolaka vwanda ve Muklisto, mu banza. Ya kele tension yayi yina me nata munu na Yesu Klisto. Beno me mona? Na yawu, ya kele kima ya lusakumunu samu na munu.

²⁰ Na yawu kuna, mutindu Paul tubaka, mutindu ntangu yandi kuzwaka tension to mwa kima to kima yankaka, yandi lombaka Mfumu na—na kukatula yandi yawu bambala tatu. Mpe Mfumu tubaka, “Saul, ya Munu. . . Paul, lemvo ya Munu me lunga.”

²¹ Yandi tubaka, “Kuna, mu ke lutila na kusala mayama na kati ya kulemba ya munu. Kuna ntangu mu kele na ngolo ve, mu kele ngolo.” Beno me mona? Ntangu nionso yina ya ke vwanda luzolo ya Nzambi, mbote.

²² Ntangu yayi, mbala mosi mu lombaka Yandi ntangu ya vwandaka tungisa munu mingi-mingi, ya pesaka munu boma. Mpe Yandi tubaka na munu, na kutala bamvula nana to kumi yina me luta, Yandi tubaka, “Ata mbala mosi ve diaka ti ya ke pesa nge boma.” Mpe ata mbala mosi ve diaka ti ya me pesaka boma. Ve, tata; beno—beno vwanda na boma ve samu na yawu. Mu ke talaka yawu, kasi mu zaba ti ya kele kuna; kasi mu ke landila kaka na kukwenda samu ti ya ke pesa munu diaka ve boma, na yawu matondo samu na yawu.

Ntangu yayi, Yandi zolaka tuba, “Ya ke vwanda diaka ve,” mutindu kaka mosi ti, “Nge ke vwanda diaka ve na boma.”

²³ Na yawu ya kele luzolo ya Yandi ti ya salama, na yawu mu ke ndima kaka yawu mpe ke tuba, “Matondo na Nge, Mfumu, mu ke baka nzila yina.”

²⁴ Ntangu yayi, beto kulumusa bayintu ya beto samu na mwa ntangu samu—samu na kusambila. Ya kele na ndombilu ya lusambulu samu na muntu? (Mu ke na kumona bamuswale na

zulu awa.) Beno telemisa maboko ya beno. Mfumu, sakumuna mosi na mosi ya bana ya Nge.

²⁵ Tata ya beto ya Mazulu, na yina ntangu yayi beto ke na kubelamaka na Kiti ya Nge, ya nene ya kimfumu ya lemvo, samu ti ba me lomba na beto na kukwisa. Beto me kwisa landila lubokilu ya Yesu Klisto. Mpe beto me kwisa na bizitu nionso ya beto, mpe ke bika yawu na zulu ya Yandi samu ti Yandi ke sokipeke na beto. Wapi mutindu ya ngolo ya nene ya kele, na kuzaba ti Yandi ke kebaka beto. Nzambi ya nene ya Mazulu, Ngangi, ke kebaka beto, ngidikulu ya Yandi. Beto kele na mayangi mingi samu na yawu, Mfumu. Wapi mutindu ya ngolo ya kele na kati ya bilumbu yayi yina beto ke na kuzingaka, na yina ti kima mosi ve ke monika samu—samu na kupesa beto ngolo kana Ndinga ya Nge ve. Yina kele kubomba ya beto, ya kele Nsilulu ya Nge. Mpe na kati ya Nsilulu ya Nge, Nge tubaka ti beto zabisa bandombilu ya beto, mpe ti “Kana beno lomba kima na Nkumbu ya Munu, Munu ke sala yawu.” Mpe Bansilulu nionso ya nene yayi: “Beno lomba mpe beno ke kuzwa. Beno tuba na mongo yayi, ‘Katuka,’ mpe ti beno kusala ntembe ve, mpe ya ke katuka.” Bansilulu nionso yayi, mpe beto lenda baka na Yawu yina beto ke na yawu nsatu.

²⁶ Maboko me telama, bawu ke na nsatu ya kima, Mfumu. Nge zaba bansatu ya bawu; pesa yawu, Tata. Mu me tula kisambu ya munu na ya bawu na ntwala ya Nge, mu me nangula diboko na bawu. Awa na zulu ya mesa yayi awa, kele na bamuswale na zulu awa. Oh, mutindu bantu yayi kele na lukwikilu, lukwikilu ya kikesa, Mfumu. . . Ya kele mutindu kaka kima yina Nge me sakumuna munu, na kuvwanda na kiyeka ya kusambila samu na bimbevo. Bisika nionso, konso kisika, bisika nionso mu ke kwenda, ya kele na kima yina ke tala na kusambila samu na bimbevo. Nzambi, sadisa ntangu yayi. Mu ke na kusambilaka na dibanza ya kusungama samu ti Nge kupesa mvutu na bandombilu ya bamuswale yayi yina ba me tula awa, samu na bantu yina me lomba yawu. Bika ti kyadi ya Nge kuvwanda na zulu ya bawu.

²⁷ Mfumu, beto zaba ti Mpangi ya kento Hicks ke na kento awa, yina me katuka kisika mosi tii awa nzila nionso na mpepo samu ti ba sambilila samu na yandi, na cancer; mpe vwandaka zola kuzaba kana yandi lendaka nata yandi awa. Mu ke sambila, Nzambi, ti Nge kupesa luzingu na muntu yango; pesa yawu. Mwa mwana-nkazi ya munu, Mikie, yina vwandaka ya kulala na kimbevo mpe yina vwandaka luka, na tiya ya ngolo na nzutu, ntama mingi ve mu me katuka kuna. Mfumu, mu—mu ke kwikila ti beto me sala kisambu ya lukwikilu kuna ti Nge me sukisa yawu, mpe mu—mu—mu me tonda Nge, na kutalaka tiya ya nzutu kukatukila mwana yango ya bakala ntete mu katuka kivinga.

²⁸ Ntangu yayi, Mfumu. . . mpe matondo na Nge samu na bima nionso yayi. Ntangu yayi ya me kubwa na kisika ya munu na

kuzonza Ndinga ya Nge. Pesa beto Ndinga ya Nge, Mfumu. “Ndinga ya Nge kele Kieleka.” Sakumuna mioyo ya beto mpe pesa beto lemvo yina beto ke na nsatu, samu ti beto lenda kubaka yawu na Bansilulu ya Nzambi na nkokila yayi, na kati ya Ndinga, samu ti ya pesa beto ngolo lumingu nionso yayi; pesa yawu. Sakumuna pasteur ya beto, moyo ya kikesa yayi, kento ya yandi, bana ya yandi, ba-diacre, ba-administrateur, mpe muntu nionso yina ke kota awa to yina ke basika na yinzo yayi ya nene; pesa yawu, Tata. Na Nkumbu ya Yesu Klisto beto me lomba masakumunu yayi. Amen.

²⁹ Ntangu yayi, mu zola kutanga na bisika zole ya masonuku ya Mfumu. Mu zola kutanga ntete na Buku ya Psaumes, Psaumes 86. Mpe na manima kutanga na Santu Matthieu, na kapu 16, na 1 tii na 3. Mpe mu zola kutanga kisika mosi na Psaumes yayi, nionso ya yawu ve kasi na nsi na kutala na nzila ya 11, yina kele mwa ndambu ya yawu.

³⁰ Mpe mu zola kupesa nsangu yayi, kana mu pesa nkumbu na dilongi ya munu, ntete mu longi yawu: *Ntangu Ya Kuvukana Mpe Kidimbu Ya Yawu*. “Kidimbu ya ntangu ya Kuvukana,” ya ke na kuwakana mutindu poto-poto. *Kuvukana* (Beni me mona?) *Ya Ntangu*, kuvukana ya ntangu, ya kele yina ya kele ntangu yayi. Mpe *Kidimbu* ya kuvukana ya ntangu yango.

³¹ Na—na Psaumes, lusambulu ya David, na Psaumes 86.

Kulumusa dikutu ya nge, O MFUMU, kuwa munu: samu ti mu kele mputu mpe yina kele na nsatu.

Bumba mwela ya munu; samu ti mu kele santu: O nge Nzambi ya munu, vuukisa kisadi ya nge yina kele na kivuvu na nge.

Wila munu mawa, O Mfumu: samu ti mu ke na kudilaka na nge konso kilumbu.

Yangidisa moyo ya kisadi ya nge: na nge, O Mfumu, mu me zangula moyo ya munu.

Samu ti nge, Mfumu, kele mbote, mpe kele ya kukubama na kulemvokila; mpe nene na kyadi na ntuala ya bawu nionso yina ke bokilaka na nge.

Tula dikutu, O MFUMU, na kisambu ya munu; . . .kuwa ndinga ya bisambu ya munu.

Na kilumbu ya munu ya mpasi mu ke bokila na nge: samu ti nge ke pesa munu mvutu.

Oh, ya kele kitoko ve? “Nge ke pesa munu mvutu.”

Na kati-kati ya banzambi ya kele na mosi ve yina kele mutindu nge, O Mfumu; mpe ya kele na ata bisalu mutindu kisalu ya nge ve.

Bayinsi nionso yina nge me sala ke kwisa kembila na ntwala ya nge, O Mfumu; nge ke kembisa nkumbu ya nge.

Samu ti nge kele nene, mpe ke salaka bima ya kuyituka: nge mosi kele Nzambi.

Beno kuwa ntangu yayi:

Longa munu nzila ya nge, O MFUMU; mu—mu ke tambula na kieleka ya nge: nata kintwadi ntima ya munu na buzitu ya nkumbu ya nge. (Kuvukana! Beno me mona?) . . . nata kintwadi ntima ya munu na luzitu ya nkumbu ya nge.

³² Mu ke na kuzonzilaka ntangu yayi na kuvukana mpe na kidimbu ya ntangu. Ntangu yayi, na kapu ya 16 ya Santu Matthieu:

Ba-Pharisien mpe ba-Sadducéen kwendaka, . . . lebika yandi mutambu, bawu zolaka ti yandi kusala samu na bawu kidimbu yina me katuka na mazulu.

Mpe Yandi vutulaka mpe tubaka na bawu, Ntangu bwisi ke bandaka na kuyila, beno ke tubaka, Mu . . . Mvula ke noka ve: samu ti zulu kele mbwaki.

Mpe na suka, Ya ke vwanda ndombi . . . mvula ke noka bubu yayi: samu ti zulu kele ndombi. O beno bantu ya luvunu, beno zaba kutendula bidimbu ya zulu; kasi beno lenda ve kutendula bidimbu ya ntangu?

Mfumu kubwela masakumunu ya Yandi ya mbote na ntangulu ya Ndinga yayi.

³³ Ntangu yayi, beto ke na kuzonzilaka na kuvukana yayi, na ntangu ya kuvukana; na kidimbu ya ntangu ya kuvukana. Beno me mona, Yesu vwandaka awa, na ntangulu ya nsuka ya Masonuku yayi, Yandi vwandaka sungika banganga-Nzambi na kuvwandaka ve na kiyeka ya kutendula ntangu to kidimbu ya ntangu. Ntangu yayi, konso ntangu ya ke vwandaka diambu ya nene samu na bantu, beno me mona, na kuzaba kutendula *kidimbu ya ntangu yina beno ke na kuzingaka*; samu ti Nzambi kusonikaka yawu pwelele samu ti muntu ve kukondwa yawu.

³⁴ Ntangu yayi, konso ntangu, mu ke vutukaka mpe ke bakaka na milongi yankaka, bisadi yankaka ya Mfumu na ntangu ya Biblia (mutindu kidimbu na ntangu ya Noe, kidimbu na ntangu ya Daniel mpe—mpe nionso yankaka yina, bidimbu yankaka), kasi na nkokila yayi mu zola kuluta yawu samu na—samu na kulanda ntangu, samu na kuvwanda na kiyeka . . . Kasi ya ke vwandaka konso ntangu mutindu ya Nzambi, samu na kupesa bawu kidimbu ya ntangu na kimuntu, samu ti muntu nionso kuzaba na wapi ntangu bawu—bawu vwandaka. Mpe ba-Pharisien yayi zolaka zaba ntangu ya bawu. Bawu zolaka zaba na wapi ntangu bawu vwandaka. Yandi tubaka na kisika

yankaka, “Kana beno zabaka Munu, beno zolaka zaba kilumbu ya Munu.” Beno me mona? Ya—ya kele kieleka, kima ya nene yina beto fwana zaba. Beno me mona, “Kukondwa kuzaba!”

³⁵ Ya kele yina bawu konso ntangu vwandaka tuba na baprofete, bawu vwandaka tuba, “Mpe yandi vwandaka na luzabu, na nzila ya ba-vision yina vwandaka katuka na Mfumu. Mpe Ndinga ya Mfumu vwandaka kwisa na baprofete ya ntama.” Beno me mona, bawu vwandaka na luzabu na nzila ya Ndinga ya Mfumu, na nzila ya baprofete. Mpe na manima, baprofete vwandaka pesa kidimbu. Mutindu muntu mosi me lala na lweka mosi mwa ntangu, na manima yandi me baluka mpe me lala na lweka yankaka. Muntu mosi katulaka yandi bilele. Mpe oh, ya vwandaka na bima mingi yina bawu salaka samu na kutalisa kidimbu yina bawu vwandaka zingila. Mpe ntangu yayi beto zaba ti Nzambi yina salaka mazulu mpe ntoto, mpe—mpe yina salaka kisalu ya Yandi ti Yandi zolaka talisa ntangu ya Yandi na nzila ya kidimbu, Nzambi kaka mosi yina kele moyo bubu yayi. Na yawu beto fwana vwanda, kima. . .Na kumonaka ntangu yina beto ke na kuzingaka, ya fwana vwanda na kima yina muntu ke kipe ve, kisika mosi. Beno me mona? Samu ti Nzambi zolaka ata mbala mosi ve kubika ti bima yayi kusalama kukondwa kupesa beto kidimbu ya kieleka, kisika yina, yina—yina beto ke bakula.

³⁶ Ntangu yayi beno tala kima yina kele bubu yayi, ti banganga-Nzambi, beto ke tangaka yawu mbote ve. Ya kele kaka mutindu ya vwandaka kuna, bawu vwandaka banza ve ti ya vwandaka ntangu. Bawu—bawu vwandaka banza ti bawu vwandaka zinga luzingu mosi ya ngemba kuna, mpe na yawu bawu vwandaka sosa Mesiya ve. Mpe Yesu tubaka ti Kwizulu ya Yandi ke vwanda “mutindu muyibi na mpimpa,” ntangu—ntangu bantu ke vwanda na dibanza ve na Kwizulu ya Yandi. Kasi ya vwandaka na ndambu ya bamwense yina kwendaka kutana na Yandi, ndambu ya bawu, bawu vwandaka na mafuta na bamwinda ya bawu mpe bawu vwandaka ya kuyilama; bawu vwandaka kutala kaka na kidimbu yina. Mpe ya kele na yina mu ke na kuzonzaka na nkokila yayi, beno me mona, na bawu yina ke na kusosaka kidimbu ntangu yayi, kidimbu ya Kwizulu ya Yandi.

³⁷ Bidimbu yayi kupesamaka, na Mfumu, ya kele ya kupesama kaka na mikwikidi. Ata mbala mosi ve ti mimpani ke mona yawu. Bawu ke luta kaka na zulu ya yawu, mpe bawu ke mona yawu ve. Mpe ntangu yayi, kaka mutindu kieleka ya kele ti Wanzio ya Nzambi lendaka vwanda ya kutelama na zulu awa na nkokila yayi, kaka kieleka mutindu—mutindu mu ke na kutalaka beno, mpe mu lendaka tala na yawu; to beno lendaka tala na yawu mpe ti munu kumona yawu ve, to mu lendaka tala yawu mpe beno lendaka kumona yawu ve. Ntangu yayi, beno zaba ti yina kele Masonuku; ya kieleka ya kele Bukieleka. Bawu

monaka . . . Beno zaba Paul kubwaka na ntoto, kasi bawu . . . ata mosi ve ya bawu lendaka kumona Nsemo yango.

³⁸ Nsemo yango vwandaka kaka kuna ntangu Jean vwandaka ya kutelama kuna na ntwala ya lutangu, mpe bafunda ya bantu kuna na simu ya nzadi, banganga-Nzambi mpe—mpe bantu ya ndwenga, bantu ya nene. Mpe Jean tubaka, yandi mosi, yandi pesaka kimbangi ti yandi monaka Mpeve ya Nzambi kukulumuka mutindu yembe mpe kulumukaka na zulu ya Yandi, mpe Ndinga tubaka, “Yayi kele Mwana ya Munu ya luzolo Yina Mu me tala mbote na kuzinga.” Mpe muntu ve monaka Yawu kasi Jean. Beno me mona? Ya vwandaka kaka samu na yandi.

³⁹ Beno talaka mutindu ya vwandaka ngenga, kidimbu ya bantu ya ndwenga? Bawu talaka, kuna vwandaka . . . Bawu vwandaka ba-Hebreu. Na kutala bawu vwandaka ve bantu ya mayela ya bima ya mazulu ya Inde, bawu vwandaka ba-Hebreu; samu ti bawu vwandaka kuna na yinsi yina samu na kutanga mayela ya mazulu, samu na kumanisa kulonguka ya bawu. Mpe na yina bawu vwandaka . . . tala na kisika ya Jerusalem, mpe na kuzabaka ti bawu kumonaka bambwetete tatu yina yina fwananaka na nzila ya lubutuku ya mosi na mosi ya bawu—ya bawu, ya Cham, ya Sem, mpe ya Japhet, na dikanda yina bawu katukaka, mosi na mosi, mpe bawu monaka bambwetete ya bawu na nzila ya lubutuku ya bawu. Yina vwandaka kidimbu samu na bawu, ti na yina bambwetete yango vwandaka na ndonga, Mesiya vwandaka na zulu ya ntoto.

⁴⁰ Oh, la la! Kukondwa ntembe bawu kwendaka, “Wapi kisika Yandi kele? Wapi kisika Yandi kele Ntinu ya ba-Juif yina me butuka? Beto me mona Mbwetete ya Yandi na Esete, mpe beto me kwisa na kukembila Yandi. Wapi kisika Yandi kele?” Bawu zabaka ti Mesiya ya mwa mwana yina vwandaka ya kulala kisika mosi, samu ti Nzambi pesaka bawu kidimbu ya ntangu, ti Nzambi na muntu vwandaka vukana kintwadi. Wapi mutindu ya kuvukana, ntangu Nzambi me vukana Yandi mosi na kati ya nzutu ya muntu! Ya ntete, ya kulutila nene na nionso ya bakuvukana yina salamaka ntete, ya vwandaka ntangu Nzambi kuvukanaka na muntu; mpe bikaka mutindu ya Yandi—ya Yandi ya nene ya kuvwanda Nzambi mpe me tandulula tenta ya Yandi mpe me baka kimuntu, mpe me kuma mosi ya bawu, samu na kukuula bawu. Kuvukana. Ya kele yinki? Ya kele yina nataka ngemba na kati-kati ya Nzambi na muntu kukonda nsuka. Mutindu beto ke vutula matondo.

⁴¹ Mpe ba tindaka bidimbu . . . Ntangu yayi beno banza ntete, muntu nionso, mpe bantu ya mayela ya bima ya mazulu; bantu yina, na bilumbu ya bawu, bamontele ya bawu vwandaka bambwetete. Ya vwandaka na mukengi yina vwandaka kwenda na zulu ya—ya yinzo ya nene, mpe yandi zolaka kwendaka na zulu kuna mpe kumona. Mpe yandi vwandaka mona ntangu bambwetete yankaka vwandaka vukana na mutindu mosi, na

yina yawu vwandaka luta, yandi vwandaka zaba wapi ngunga ya vwandaka. Beno ke bambuka moyo na Masonuku, “Wapi ntangu ya me kuma, mukengi?” Mpe mukengi vwandaka vutuka mpe vwandaka tuba na yandi wapi ngunga ya vwandaka. Beno me mona, bawu vwandaka tanga ntangu na nzila ya bambwetete.

⁴² Ntangu yayi, ya kele ngitukulu ve ti bambwetete yayi vwandaka kieleka na nzila samu na bantu tatu yayi mpe ti muntu yankaka ve kumonaka yawu? Beno me mona? Kieleka kaka na nzila. Ntangu yayi, beno lenda vwanda mpe na nzila na Masonuku. Beno me mona? Ntangu bambwetete yango kuvukanaka, kuvukanaka yawu mosi kintwadi na kuvukana yayi, bantu tatu vwandaka mpe ya kuvukana na ntangu mosi. Mpe beno lenda vwanda kieleka ya kuvukana na Nzambi, na Ndinga ya Yandi, tii bima yayi ke kuma kieleka, mpe beno lenda mona yawu mpe kuzaba ti yawu kele kieleka. Beno me mona? Kidimbu ya ntangu! Beno lenda tala na lweka ya yawu, kutuba, “Ah, buzoba!”

⁴³ Kasi na *beno* ya kele buzoba ve. Na beno, beno kele ya kuvukana na Ndinga, mpe awa Yawu yayi. Kuna ya kele—ya kele kieleka Nsemo, Mpangi Pat, ntangu—ntangu—ntangu—ntangu beno ke mona kidimbu yayi kuvukana na mukwikidi. Mpe ya kele na yandi mu ke na kuzonzilaka yawu, na mukwikidi, samu ti ata mbala mosi ve muntu ya ntembe ke mona yawu. Mpe wapi mutindu ya kusungika ya zolaka vwanda kana Yandi vwandaka na zulu ya ntoto bubu yayi, na mingi ya banganga-Nzambi ya beto bubu yayi, yina lenda tanga ve kidimbu yayi; bidimbu yina beto ke na kutangaka konso kilumbu awa na tabernacle, mpe kumona bima yango. Mpe bayankaka ke tanga yawu mpe ke mona nsonokono na kibaka, mpe diaka mingi ke kipe kaka yawu ve, mpe bawu ke mona yawu ata fioti ve. Na nionso ya kele kima ve samu na bawu; bawu ke tala yawu ve.

⁴⁴ Ntangu yayi beno tala, ti na kati ya yayi, ti Yandi—Yandi me talisa bidimbu ya bayinsi. Ntangu yayi, ntangu bawu yufulaka Yandi samu na yayi, bawu vwandaka sosa bidimbu; mpe Yandi pesaka bawu bidimbu yina salamaka. Mpe bawu vwandaka sosa na kuzaba wapi ntangu ke vwanda nsuka ya yinza, yinki ke vwanda kidimbu na nsuka. Mpe Yandi talisaka bawu bisika mingi na nzila ya Masonuku yina me tala bidimbu ya bayinsi, na yina me tala kidimbu ya mazulu na kati ya mazulu, mpe kidimbu ya ntoto; Yandi pesaka bawu bidimbu, kidimbu, bidimbu, ntangu nionso kidimbu. Mpe ntangu . . . Yandi tubaka na bawu kuna na kisika mosi na yina me tala kidimbu ya yinsi. Yandi tubaka, “Ntangu beno ke mona bayinsi,” beno me mona, “kubanda kuvukana na kizunga ya Jerusalem,” beno me mona, kuna beto ke zaba ti ntangu ya bawu ya mpasi me belama, “ntangu beno ke mona Jerusalem kuzunga na makesa.”

⁴⁵ Ntangu yayi, ntete ti bawu lenda kusala yayi, Nzambi . . . yinza zolaka kuvukana. Titus, mfumu ya nene yayi ya basoda

ya Rome, zolaka kuvukisa basoda ya yandi kintwadi mpe kubelama, na manima ba-Juif kumangaka kidimbu ya ntangu yina Nzambi kupesaka bawu. Ya vwandaka na ntangu yina Titus kuvukisaka basoda ya yandi kintwadi, mpe kwisaka baka mbanza. Ntete ya zolaka vwanda na kuvukana ya bantu ya Nzambi (mutindu ba ke bokilaka bawu) kutelemina Ndinga ya Nzambi, ntete ti yinsi kuvukana yawu mosi na kuteleminaka bantu ya Nzambi. Beno me mona, kunata kintwadi, kuvukana; kuvukana kintwadi.

⁴⁶ Mu ke kwikila ti beto ke na kuzingaka na kati ya ntangu ya nene ya kuvukana. Mu ke na kunotikaka minda ya mbwaki yayi, mpe bapano ya minda ya malongi yayi mpe nionso yina (ya bakento, mutindu bawu ke salaka; mpe babakala, mutindu bawu ke salaka; mpe mabuundu, mutindu bawu ke salaka), na kulakisa na mwa nkonga yayi, na ntima ya munu nionso, ti mu ke kwikila ti beto ke na kutambula na nzila ya Ndinga ya Nzambi na kati ya ngunga ya nene yayi ya profesu, kaka ntete Kwizulu ya Mfumu Yesu; kuvukana kintwadi mpe kuvwanda ya kuyilama.

⁴⁷ Ntangu yayi, beno me mona, ntete ti Titus kuvukisa bayinsi . . . basoda ya yandi kintwadi, Israel kuvukanaka bawu mosi kintwadi mpe salaka nkonga bawu mosi, ti bawu zolaka kukwikila ve ti Yesu vwandaka Mesiya. Bawu mangaka Yandi, mpe tulaka Yandi na nganda, mpe bawu komaka Yandi na kulunsi. Mpe kuna, ntangu bawu mangaka mpulusu yina ba tindaka bawu, bawu kuvukanaka bawu mosi kintwadi samu na kusala yawu. Ntangu yayi, beno bumba yawu na yintu: kuvukana bawu mosi kintwadi, samu na kumanga Nsangu ya ngunga! Ya lungaka ti bawu kusala yawu. Mpe kuna ntangu bawu kusalaka yawu, kuna kidimbu ya yinsi me kwisa.

⁴⁸ Bayinsi kubandaka na kuvukana bawu mosi kintwadi, mpe Titus kunataka makesa ya nene yayi ya Rome mpe ya Grece mpe zungaka bibaka ya Jerusalem, yandi kangaka bantu yayi na kati kuna awa, mpe bawu vwandaka kufwa na nsatu. Bawu vwandaka kudya bampusu ya bayinti. Ya kele yina Josèphe, kisoniki ya nene ya masolo ya ntama, me zonza na beto. Mpe bawu vwandaka kudya matiti yina vwandaka na ntoto. Bawu tokisaka mpe mosi na mosi ya bawu bana mpe kudiaka; beno me mona, mutindu ti bawu vwandaka bilawu. Mpe kuna ntangu, na nsuka, Titus, yina vwandaka ya kuvwanda na zulu ya mwa myongo, kuna na kizunga ya Jerusalem, mpe—mpe bantu yina na kati kuna vwandaka banza ti bawu vwandaka sala luzolo ya Nzambi, ntangu bawu kumonaka basoda yayi kubelama. Bawu mangaka na kuwa Mfumu ya Nene yango, Mfumu Yesu, kutuba yawu na bawu.

⁴⁹ Ya vwandaka na ata mosi ya bawu ve Miklisto yina ba simbaka na kati kuna, samu ti bawu kumonaka kidimbu mpe kwendaka. Beno me mona? Bawu tubaka, “Bika ti yina ke vwanda na kibandu ya yinzo kukulumuka ve, to yandi yina kele

na bilanga kuvutuka ve, samu na kubaka kiyunga ya yandi; kasi beno kima na Judée, mpe beno sambila ti kukima ya beno kuvwanda ve na ntangu ya hiver to na Saba.” Samu ti, na ntangu ya hiver, miongo ke vwanda ya kifuluka na mvula ya mpempe; mpe na kilumbu ya Saba, mwelo—bamwelo ke vwandaka ya kukangama, nkoloto, mpe na mutindu yina ba zolaka simba bawu. Beno me mona? Beto zola kubaka yawu ntama ve na . . . mutindu Nzambi ke salaka mambu yayi, kana Mfumu zola.

⁵⁰ Beno tala ntangu yayi, Yandi . . . Bawu sambilaka ti yawu kuvwanda ti . . . kuvwanda mutindu yina ve, Yesu tubaka na bawu na kusambila samu na yawu, mpe ata mbala mosi ve ti ba simbaka mosi ya bawu na kati kuna. Bawu kwendaka samu bawu talaka na kidimbu, mpe bawu kwendaka; ya vwandaka nionso yina vwandaka na yawu.

⁵¹ Oh, mutindu mabuundu ya bubu yayi zolaka kumona kidimbu ya ntangu yina beto ke na kuzingaka! Beno tina mutindu ya mbangu yina beno lenda na Calvaire, samu na Luzingu; na mwa dibuundu ve, kasi na Yesu Klisto. Beno vukana na Yandi, kasi na organisation mosi ve to na credo mosi ya dibuundu ve. Beno vukana na Klisto, mpe beno tala mbote ti ya kele Yandi. Beno lenda kubaka kaka kima ve, beno fwana ndima ti ya kele Yandi. Wapi ntangu ya kuvukana!

⁵² Ntangu yayi, beto me tala ti bawu kumangaka Mesiya mpe na manima bawu kuvukanaka bawu mosi kintwadi mpe kumaka mosi bawu mosi, mpe salaka . . . ndimaka bawu nionso ti kana bantu kundima Yesu mutindu Profete, ti bawu ke tula bawu na nganda ya dibuundu. Beno bambuka moyo na mwana ya bakala yina vwandaka na meso ya kufwa yina meso vwandaka ya kufwa? Mpe bilandi tubaka, “Nani me sumuka? Yandi, to tata ya yandi, to mama ya yandi?”

⁵³ Mpe Yesu tubaka, “Na dyambu yayi, ata yandi yayi to yandi yina ve; kasi samu ti bisalu ya Nzambi kusalama, kuzabana.”

⁵⁴ Mpe beno ke bambuka moyo ti, ba tubaka ti tata na mama lendaka ve na kutuba. Bawu tubaka, “Bawu zaba ti yayi kele mwana ya bawu ya bakala, kasi beto zaba ve mutindu yandi me beluka.” Samu ti ba-Juif tubaka ti muntu yina ke zonza ti Yandi kele Profete, ti ba ke tula bawu na nganda.

⁵⁵ Kasi, beno me mona, bisalu ya Nzambi vwandaka ti mwana ya bakala yayi kuvwanda ve na nkonga yina. Mpe yandi tubaka, “Ntangu yayi, ya kele kima ya ngitukulu samu na munu ti nge zaba ve kisika Muntu yayi me katuka, mpe kasi Yandi me zibula munu meso.” Beno me mona? Awa, yandi lendaka kutuba yawu. Beno me mona, yina vwandaka bisalu ya Nzambi. Yandi kubelukaka, mpe vwandaka mbote, mpe yandi lendaka—yandi lendaka kutuba yawu samu ti yandi vwandaka ata kisika mosi ve ya kukanga na singa. Ya vwandaka na yandi ti bisalu

kusalamaka, mpe kieleka yandi monaka ya yandi . . . mbala ya yandi ya ntete na luzingu ya yandi.

⁵⁶ Ntangu yayi, ba-Juif kuvukanaka bawu mosi na kuteleminaka Yesu mpe—mpe teleminaka Bumesiya ya Yandi, mpe Nsangu ya Yandi ya Bumesiya. Beto ke mona kima mutindu mosi kusalama ntangu yayi, kima kaka mosi. Communisme ke na kuvukanaka samu na kubebisa dibuundu, mpe kaka mutindu yina yawu . . . yina ke vwanda na manima dibuundu ke vukana yawu mosi mpe, na Conseil ya Mabuundu, na Conseil ya Mabuundu ya Yinza ya muvimba, samu na kumanga mpe na kubebisa Nsangu, Ndinga! Bawu mangaka Ndinga, mabuundu salaka yawu! Bawu lenda ve kundima Yawu samu ti Yawu ke telemina credo ya bawu ya ba-denomination; ata lutangu ya Makunzi ya Tiya yina lendaka vwanda na zulu ya beto . . . na kati-kati ya bantu, to lutangu ya bantu yina ke vwanda . . . lutangu ya bima yina ba lendaka bikula mpe yina zolaka salama, mpe bidimbu nionso ya nene yina Yandi silaka na kilumbu ya nsuka; bawu lenda ve kusala yawu.

⁵⁷ Na yawu, bawu ke na kuvukanaka bawu mosi ntangu yayi, mpe pasteur ya beno awa mpe diaka mingi lendaka tuba yawu na beno, bayina ke tangaka, ti ya kele . . . kuzwa mouvement ya oecumenisme. Mpe . . . ya kele na mulongi ya Luther na kimfumu ya yawu. Ti, kana diambu kubwa, kusalama awa; kana beto kuvukana ve na mouvement ya oecumenisme yina, kuna dibuundu ya beto lenda diaka ve kuvwanda dibuundu, mpe bawu lenda kusadila yawu mutindu kibumbulu. To kana mosi ya beto bampangi—babakala lendaka mona muntu kufwa to kutala mpasi, mpe ti beto kumeka na kupesa na yandi mosi ya lusakumunu ya Kimpeve, ba lenda kubula beto samu na yawu; ya kieleka. Ba lenda pesa beto bamvula kumi na kati ya boloko samu ti beto me sadisa, samu ti beto kele muntu ya mouvement ya oecumenisme yayi ve. Beno ke mona kidimbu ya niama ve? Beno me mona? Beno me mona?

⁵⁸ Ntangu yayi, beto ke na kumonaka ntangu ya kuvukana yayi kukwisa. Beno me mona? Ntangu yayi, beno tala mbote! Mpe kuna dibuundu me vukana yawu mosi na kuteleminaka Nsangu; mpe kuna na yina yawu ke sala mutindu yina, bayinsi ke vukana bawu mosi na kati ya Communisme samu na kubebisa diaka dibuundu; kaka mutindu mosi yina yawu kusalaka na ntonono. Beno me mona? Ya ke na kuvutukilaka kaka diaka.

⁵⁹ Israel zolaka kumanga ntete Nsangu. Mpe na yina bawu kumangaka Nsangu, kuna basoda, luzingu ya yinsi kuvukanaka yawu mosi kintwadi (ya bayinsi yankaka), mpe kwisaka kuna mpe bebisaka dibuundu. Mpe bubu yayi, bawu me manga Nsangu ya Mfumu Yesu, mpe bawu me manga Yawu. Mpe ntangu yayi, ntangu me kuma kisika Communisme ke na kuvukisaka yinza na kutelemina dibuundu. Beno me mona, ya fwana

vwanda mutindu yina. Ntangu yayi, ya kele mpasi mingi na kutuba yawu.

⁶⁰ Ya vwandaka mpasi mingi na ba-Juif yayi na kukwikila. Bawu tubaka, “Ntangu yayi beno kwisa, bankundi, beto ke mona ti—ti ya beto—ya beto Nzambi kele na beto, mpe na yawu beto ke—beto ke kwenda na tempelo. Mpe awa beto ke sambila, mpe ke bika tata ya santu *Kingandi* mpe tata ya santu *Kingandi* na kutwadisa na lusambulu. Beno kanga nkotolo!” Mpe Titus kubakaka kisika ya yandi, mpe telamaka kaka kuna na kutala mvula mosi to kulutila. Beno me mona, kaka na kusalaka nkengololo, mpe me bika bawu kufwa na nsatu. Ata mosi ve ya bawu lendaka kukwenda na nganda ya mbanza; mpe bawu kufwaka, na nsatu. Mpe ntangu yandi kotaka kuna mpe bwisisaka bibaka, menga tangaka mpe mutindu bamwila kuna ntangu yandi kufwaka nionso yina vwandaka kuna.

⁶¹ Na kutala, Wanzio ya Mfumu pesaka profesu ya yawu, kuna na Ngwisani ya Ntama, mpe tubaka ti yawu zolaka salama. Mpe milongi ya bawu, bayina vwandaka banganga-Nzambi, bawu zolaka vwanda bayina zolaka landisa yawu mpe bayina zolaka tuba yawu na bantu, na kisika ya yawu, ntangu Yesu telamaka na kati-kati ya bawu, bawu zabaka Yandi ata fioti ve; mpe vwanda meka na kusala . . . mutindu ya dikulu ya kalumbu, “Monisa beto kima, bika beto kumona wapi mutindu—wapi mutindu ya kele ya kusala! Lakisa beto kidimbu.” Beno me mona?

Mpe Yandi tubaka, “Mu. . .” Kasi, Yandi salaka bima mingi, mpe diaka bawu lendaka ve na kumona yawu. Beno me mona? Mpe kuna na yina bawu mangaka Yandi mutindu ya bawu. . . Nsangu ya kilumbu yina, bawu kumangaka Nsangu ya kilumbu yango.

⁶² Bawu kondwaka na kumona kidimbu ya kilumbu yango. Mpe kidimbu ya profesu ya Biblia kusalamaka na ntwala ya bawu, mpe bawu tubaka, “Beto kama ntangu yayi!” Ba vwandaka bantu ya santu. Ba vwandaka bantu yina beno lendaka ve kusonga musapi na luzingu ya bawu. Bawu lendaka ve kuvwanda mutindu *yayi*, mpe na manima—mpe na manima kuvwanda nganga-Nzambi. Ba zolaka kufwa nganga-Nzambi, ba zolaka kufwa yandi na matadi samu kaka na mwa kima. Na yawu ya lungaka ti yandi kuzinga luzingu ya kukondwa mvindu, ya santu. Yandi zolaka kusala yawu ve, samu ti ba zolaka losa yandi matadi samu kaka na mwa kima. Mpe na yawu bawu vwandaka bantu ya nene, mpe bantu ya santu na meso ya bantu, mpe kasi bawu kwendaka na kati mpe tubaka, “Ntangu yayi, beto ke . . . Beto ke na Nzambi, Nzambi Yina vwandaka na beto na nzila nionso ya bansungi. Beto ke kota na tempelo ya Yandi ya santu.” Yina vwandaka tempelo ya santu ya Nzambi! Kasi, beno me mona, ba mangaka Yandi na kati ya tempelo ya Yandi ya santu. Beno me mona? “Beto ke kwenda na kati ya yinzo ya Mfumu. Ntangu yayi beno nionso ba-Hebreu zaba ti beto kele

dikanda yina ba soolaka, beto, bawu yayi. Mpe Nzambi kele Nzambi ya beto; Nzambi ya Abraham, ya Isaac, mpe ya Jacob. Yandi kele na beto. Yandi ke vuukisa beto na ba-Phillistin yina ba me zenga ve na nganda kuna (mutindu ya vwandaka), ba-Romain mpe ba-Grec yango. Yandi ke vuukisa beto na yawu. Beto kota na yinzo ya Mfumu!”

⁶³ Ya ke wakana mbote; kasi yinki bawu kusalaka? Mutungi yinzo vwandaka na kati kuna, na mutindu ya kulemvuka na kati ya kisadi-mabaya ya muntu ya Galilée, kasi bawu mangaka Yandi; na yina Nzambi pesaka kimbangi ya Yandi na kuvwandaka Munati-nsangu ya Yandi ya ngunga yango, mpe Nkuna. Kasi bawu mangaka Yawu. Na yawu balusambulu nionso, kusungama nionso, minkayulu nionso ya bawu zolaka tuba kima ve samu na Nzambi. Bawu kusalaka yawu! Mpe Nzambi bikaka ti makesa ya kuvukana yayi kubebisa yawu.

⁶⁴ Mpe beto ke mona bubu yayi, mutindu mabuundu na nzila ya ba-denomination mpe nionso yina, ke na kumangaka Ndinga ya Nzambi. Ba zola ve ti beno kutuba na bawu na yina me tala bima yayi, mpe ti luzabu ya yinza na kimuntu lendaka monikisa yawu na nzila ya bafoto mpe nionso yankaka, kasi diaka bawu zola kima mosi ve ya kusala na Yawu. Na yawu communisme ke na kuyilamaka samu na kubebisa yawu, kieleka kaka mutindu Titus kusalaka, mpe Biblia ke tuba ti bawu ke sala yawu. Kieleka!

⁶⁵ Ntangu yayi, beno me mona kisika beto ke na kuzingaka? Ntangu ya kuvukana, na yina beto ke mona bima yayi kuvukana. Oh, samu na yinki beto ke na kukondwa na kumona bima yayi? Beno lenda—beno lenda tala na kati awa na kati ya Masonuku mpe kumona kisika yina Yandi silaka yawu, yina Yandi ke sala. Ntangu yayi, beto ke mona yawu kusalama. Beto ke mona na kati ya dibuundu yinki Yandi silaka na kusala; beto ke na kumona yawu kusalama. Beto ke na kumona bayinsi kuvukana kintwadi. Beto ke mona ba-isme kuvukana kintwadi. Beto ke mona mabuundu kuvukana kintwadi. Ya kele ntangu ya kuvukana. Ya kele ngunga ya kuvukana. Ya kele mpeve ya nsungi, “Beto fwana kuvukana.” Nionso yina beno ke zonga beno fwana kubongisa yawu; kana ve luyalu ke yamba yawu ve.

⁶⁶ Beno zaba, na kuvwandaka muntu ya yinsi. . . Mu lenda ve mutindu mwisi-ntoto, mutindu mwisi-ntoto ya États-Unis, na kutala munu—munu. . . beno lenda pesa munu mukanda ya mbongo ya lutangu ya ba-dollar tanu mpe mu lenda ve kusonika nkumbu ya munu na zulu ya yawu. Hmm. Beno me mona, mu lenda ve kusala yawu. Beno me mona, ya kele ntangu ya kuvukana. Nionso ya yawu fwana kuluta na mutindu mosi kuvukana, mpe kuvukana yina kele kima ya kieleka yina ke nata kidimbu ya niama. Beno me mona? Ya kele ntangu ya kuvukana, mpe ya ke na kukwendaka kaka na lweka ya yawu. Beno lenda kumona yawu na meso ya beno, kana beno tala na yawu. Ya kele ntangu ya kuvukana, kisika nionso kintwadi ke na kuvukanaka.

⁶⁷ Juif—ba-Juif kuvukanaka bawu mosi na kuteleminaka Yesu, na kuvwandaka ya bawu—na kuvwandaka ya bawu Mesiya. Na yawu, beto me mona yinki kusalamaka. Beto ke mona kima mosi ntangu yayi, communisme ke na kuvukanaka samu na kubebisa dibuundu, na manima dibuundu kuvukanaka na Conseil ya Mondial ya Mabuundu mpe mekaka na kubebisa Nsangu, Ndinga ya Nzambi. Ba mekaka na kulosa Yawu. Kima kaka yina bawu lendaka kusala vwandaka kusala samu na bawu mosi lukutakanu, samu ti bawu kele ya kukabuka; mwa nkonga awa, ya ba-Methodiste, mpe ya ba-Baptiste, mpe ya ba-Lutherien, mpe ya ba-Presbyterien, Dibundu ya Klisto, mpe nionso yankaka ya mutindu yina. Ba lenda ve kusala kima, samu ti yandi *yayi* ke telemina yandi *yayi*, yandi *yayi* ke telemina *yankaka* yina, malongi ya bawu kele kaka ya kuswaswana mutindu este kele na weste. Beno me mona, ba lenda ve kusala yawu. Kasi mbala mosi kintwadi, na nsi ya mfumu mosi ya nene, bawu me kuzwa yawu. Bawu kuzwaka yawu kuna.

⁶⁸ Ya kele samu na yina bantu ya Catholique kele ya kuvukana mutindu yina, bantu ya Catholique ya Rome, samu ti bawu kele ya kuvukana, bawu kele. . . ya kulutila kele bantu ya Catholique ya Rome; ba ya Grece mpe ya ba-Catholique yankaka kele—kele mingi ve mutindu ba ya Catholique ya Rome. Awa bawu ke na kuvukanaka kintwadi, mpe ya kele samu na yina bawu kele ya kutelama kintwadi. Ata nionso yina lendaka salama, pape kele mfumu ya nionso. Beno me mona? Mpe ata nionso yina muntu yankaka ke tuba, “Yandi kele yina ke kondwaka ve; yandi kele—yandi kele—yandi kele kilandi ya Nzambi, kaka yina; yandi kele yina ke landaka Nzambi; yandi ke na luyalu na zulu ya difelo, na Mazulu, mpe na kisika ya kuvedisa bafwa.” Beno me mona? Na yawu ya kele na kima ve yina lendaka salama na mambu *yina*; nionso yina yandi ke tuba, ya kele yina ke salama.

⁶⁹ Ntangu yayi, ba-Protestant ke na kukisalaka mfumu kaka mutindu yina, mutindu mosi. Mpe Biblia ke tuba ve ti kifwani kusalamaka na kibulu? Yinki kele kifwani? Ya kele kima ya mutindu mosi na yawu, yina ba me sala mutindu yawu. Yawu yayi, kima ya mutindu mosi. Yinki ya kele? Na nzila ya kuvukanaka bawu mosi kintwadi, mpe yayi kele mpeve ya nsungi, ya kele *kuvukana*.

⁷⁰ Kuvukana kintwadi ntangu yayi, samu na kumeka na kubebisa Nsangu. Wapi mutindu bawu ke bebisa Yawu? Wapi mutindu bawu lenda kubebisa Ndinga ya Nzambi? Bawu lenda kusala ti Yawu kukota na kisalu ve, kupesa ndandu ve, na kubakaka binkulu mutindu bawu kusalaka ntama kuna na mbatukulu, mpe salaka ti Ndinga ya Nzambi kukota na kisalu ve. Beno me mona, bawu ke tuba, “Oh, yina kele. . . Kieleka, na manima ya nionso. . .” Beno me mona kisika kento yayi ya kukwikama ve yina ke na kumekaka na. . . yandi. . . Mu me

zimbana nkumbu ya yandi awa; kana mu lenda kaka kubokila yawu. Yandi . . . Mu ke na kumekaka na kusimba mingi.

⁷¹ Mu vwandaka banza kilumbu yankaka yina na Mama Nation; mu zola ti beto kuzwa diaka mosi mutindu yandi yina ke baka ntelamanu. Yandi vwandaka yandi yina vwandaka kwenda na banganda mpe vwandaka losa na nganda whiskey, mpe vwandaka katula mikanda ya nsangu mpe nionso ya mutindu yina. Samu na yinki bubu yayi kento mosi lenda ve kutelama mutindu yina, mpe kubasika awa mpe kupasula bafoto ya bakento yayi yina kele na bilele ve bayina kele dikanda ya yandi, mpe bima ya mutindu yina? Ti, ya kele diaka ve na bawu.

⁷² Mbote, kasi kento, ya kukwikama yayi ve, yina tubaka ti—ti “kutanga Biblia na balukolo ya luyalu, kele na kati ya misiku ya yinsi ve,” mpe bima ya mutindu.

⁷³ Ntangu yayi yina bawu ke na kusalaka, beno me tala diaka, ntangu yayi bawu ke na kumekaka na kutuba, mpe bantu ya nene yina ke tangaka Masonuku, bawu ke na kutuba ti “mingi ya baprofesi yina ba pesaka profesi na kati ya Biblia vwandaka nionso ya luvunu, mpe ata mbala mosi ve ti yawu kusalamaka.” Mpe beno kuwaka yawu mpe tangaka yawu. Mpe bawu ke na kusosaka na kutuba nionso; beno me mona, bawu ke na kusosaka na kubebisa ngolo ya Ndinga. Kana ba lenda kubebisa kaka mpe kuyingisa Yawu na credo to na yina kele kima ya bantu, ya ke monana na meso ya bawu mbote kulutila Ndinga, kuna bawu ke bebisa Yawu na kinkulu ya bawu—ya bawu. Mpe ya kele mutindu yina bawu ke na kusosaka na kubebisa Ndinga ya Nzambi, ya kele na nzila ya bapolitiki ya denomination.

⁷⁴ Ntangu yayi, konso dibuundu kele na bapolitiki ya yawu. Dibundu ya Klisto kele na ya yandi, dibuundu ya Muklisto kele na ya yandi, mpe ba-Baptiste, mpe ba-Methodiste, mpe ba-Presbyterien; bawu nionso kele na ya bawu mutindu ya bapolitiki. Ntangu yayi, bawu ke na kukwendaka ntama na yawu samu ti bawu kele ya kukabuka. Beno me mona, ya zolaka kusalama ntete ve, ba fwana kusala yawu ntangu yayi. Beno me mona, yayi kele ntangu ya kuvukana, mpe ntangu yayi bawu ke na kutulaka yawu nionso kintwadi mpe ke mona na yinki bawu ke basika. Oh, ya kele mutindu kusala dimpa na musuni ya mpunda, mpe yina me katuka na fulu, mpe nionso yankaka yina ba me vukisa; mpe kuvukisa yawu na ba-boulette, mpe kutula mwa bambala ya sukadi mpe bima yankaka kintwadi, mpe kumona yinki yawu ke pesa. Kieleka ti mu ke zola ata fioti ya yawu ve. Ve, tata! Ya kele mutindu yina bawu ke na kusalaka. Beno me mona, bawu ke na kubakaka bantu yina ke kwikilaka ti Yesu vwandaka luvunu, dibuundu yina ke kwikilaka ti Yesu vwandaka luvunu; yankaka, bayankaka ke kwikilaka ti Yandi vwandaka profete.

⁷⁵ Mosi ke tuba, “Bilumbu ya bimangu lutaka.”

⁷⁶ Yankaka ke tuba, “Ya lenda vwanda na kima ya mutindu yina.”

⁷⁷ Mpe nionso yayi kintwadi; mpe Biblia ke tuba, “Wapi mutindu bantu zole lendaka kutambula kintwadi kana ti bawu kuwisana ve?” Beno me mona? Ntangu yayi, yayi kele mutindu ya kuvukana yina kele na bawu. Mpe kuzwa mwa tata ya nene ya santu ya kutula na ntwala ya yawu, mpe kuna beno ke kuzwa kifwani ya kibulu, kaka kieleka na yina Biblia ke tuba. Ntangu yayi ba kele na mulongi ya Lutherien, na kimfumu ya yawu. Mbote, beto ke mona ti ya kele ntangu ya kuvukana. Kima mosi ntangu yayi, Communisme mpe nionso ke na kuvukanaka kintwadi; na yinza, mpe na dibuundu mpe nionso yankaka yina, ke na kuvukanaka kintwadi.

⁷⁸ Beno tala mbote yinza. Oh, la la! Yinza, kana beno lenda kaka kutala mbote yinza, yawu ke salaka kima mutindu mosi. Yinza kele kalanda ya Nzambi ya bidimbu. Beno vwandaka zaba yawu? Yesu tubaka na bawu na kutala mbote yinza. Nzadi ke sala makelele, beno me mona, mpe ya ke vwanda na bima ya mutindu na mutindu, mpe kuningana ya ntoto na bisika mingi, kunwana ya bayinsi, bidimbu na mazulu, bidimbu na ntoto, bisika nionso ya ke vwanda na bidimbu ya ntangu yina ke na kwisa.

⁷⁹ Beno tala mbote matuti. Ntete matuti kusala mvula ya ndolo, beno zaba mutindu yawu ke salaka? Mingi ya mwa matuti ke vukanaka kintwadi, samu na kusala dituti mosi ya nene. Mbote, yandi yayi ba ke pusa yandi na mwa mupepe, yankaka yayi ba ke pusa yandi na mwa mupepe, mpe bawu nionso ke pusana kintwadi, mpe kuna bawu ke kuzwa kitembo ya ngolo. Beno me mona? Bawu ke vukanaka ntete bawu kuzwa mvula ya mupepe ya ngolo; ya fwana vwanda kaka.

⁸⁰ Beno tala mbote mabata mpe ba-oie yina ke vukanaka kintwadi ntete bawu kukatuka yinsi ya bawu. Beno me mona? Bawu ke vukanaka kintwadi. Beno lenda kumona bawu kupepa kiziba yayi na kiziba yankaka, na awa na kuna, bawu nionso kintwadi. Bawu ke na kuvukanaka, samu na kukwenda. Beno me mona, ya kele kaka . . . yina kele yinza, mpe Nzambi salaka yinza, mpe yinza ke tambulaka na nzila ya manaka ya Nzambi. Ya kele musiku, musiku ya Nzambi ya kusonama ve, yinza ke tambulaka na kulandaka musiku ya Yandi.

⁸¹ Kaka mutindu, ba ke zonzaka na kisalu ya mafwa, ya ke vwandaka na masa ya yinti yina ke kwendaka na nsi ya ntoni, na nsi ya misasi ya yinti, kuvwanda kuna tii na mvumbukulu ya printemps. Ya kele musiku ya Nzambi. Ya kele na ata mayela ve yina lenda sala ti masa ya yinti yina kukwenda na nsi kuna; beno lenda ve kuyumisa yawu, beno lenda basisa yawu ve. Ya kele na mutindu ve ya kusala yawu kulutila mbote na yina Nzambi ke salaka yawu. Nzambi kele na mutindu ya kulunga. Na yawu ntangu dikasa ke kubwaka, kuna Yandi ke tindaka masa ya

yinti na nsi na ntoni mpe ke bumba yawu. Mutindu Job tubaka, “Bumba munu na ntoni tii makasi ya Nge ke mana.” Beno me mona? Ya ke kwenda na nsi kuna samu ti ya kele musiku ya yinza, ntete madidi. Beno tala matiti ntangu yayi kubanda na kubwa. Samu na yinki? Ya kele musiku ya yinza.

⁸² Mabata ke vukana, konso mosi ya bawu, kuvukana pene-pene ya ntwadisi. Kuna na mutindu yayi to yankaka bawu zaba, mu zaba ve wapi mutindu bawu ke salaka yawu, kasi bawu zaba ti mwa dibata ya bakala yina kele ntwadisi. Mpe mwa kibulu yina, bawu nionso ke vwanda kintwadi mpe ke vukana pene-pene ya yandi, mpe bawu ke dumuka na zulu. Mpe yandi ke . . . ata mbala mosi ve ti yandi me katukaka kiziba yina ntangu yayi, kasi yandi ke kwenda kaka na Louisiane to na Texas yandi ke kwenda, na bilanga ya loso. Beno me mona, ntete bawu kukwenda na zulu, kubika yinzo ya bawu kisika yina ba butaka bawu mvula yina, bawu ke vukana. Amen! Beno bawu yayi; kuvukana pene-pene ya ntwadisi ya bawu.

⁸³ Yimbi, ya muntu, kele ti yandi zaba ve ntwadisi ya yandi. Yinga, tata. Bawu ke na kuvukanaka pene-pene ya denomination, bawu ke na kuvukanaka pene-pene ya mfumunganga-Nzambi to pene-pene ya muntu, kasi bawu zola ve kuvukana pene-pene ya Ntwadisi, Mpeve-Santu na kati ya Ndinga. Beno me mona? Bawu ke tuba, “Oh, mbote, mu ke na boma ya kukuma mwa fanatike; mu ke na boma ya kubaka dikulu ya yimbi.” Ohhhh, beno bawu yayi! Yinki kana mwa dibata yayi kutuba, “Mu ke zolaka kaka ve mutindu yandi ke yidikaka mapapu ya yandi. Mu banza ve ti mu ke landa yandi.” Beno ke kufwa na madidi. Beno ke kangama kuna, kana beno kwenda ve na—na bawu ntangu bawu ke dumuka na kwenda. Bawu ke vukana kintwadi, mpe yinza ke salaka yawu.

⁸⁴ Ba-oie ke vukanaka bawu mosi kintwadi, ke vukanaka bawu mosi pene-pene ya ntwadisi ya bawu; bawu ke salaka kima mutindu mosi.

⁸⁵ Beno me talaka ntete baniosi kukatuka kisika samu na kisika yankaka? Baniosi ke vukana bawu mosi kintwadi, ntete bawu kukatuka kisika samu na kisika yankaka, kaka pene-pene ya ntinu ya bawu ya kento. Ya kele kieleka. Mpe kisika yina yandi ke kwenda, bawu mpe ke kwenda. Yinga! Yinki bawu ke na kusalaka? Bawu ke vukana ntete bawu kukatuka. Kieleka; konso kima ya yinza!

⁸⁶ Bambisi ke vukanaka bawu mosi ntete nzietelo ya printemps. Kuna na kati ya nzadi, beno lenda tala bawu; ba ya nene. . . yina beto ke bokilaka “nkunki,” mbisi ya saumon. Ntangu bawu ke belamaka kuna, ntete ti nzietelo yayi kusalama, beno ke mona bawu na nzila ya makumi ya mafunda, kuna na kati ya nzadi yayi, kukwisa pene-pene mpe pene-pene; na masa ya mungwa, kasi kieleka ba kele bambisi ya masa ya mbote. Mpe awa bawu

ke kwisa kaka na masa ya mbote yayi, bawu ke mata samu na nsungi ya madidi. Bawu ke mata kuna mpe ke buta bameki, na kutala konso bamvula yiya, mpe bawu ke kufwa katuka bawu kubuta bameki. Mpe bawu zaba ti bawu ke na kukwendaka kuna samu na kufwa, mpe beno lenda sukisa bawu ve na kima. Bawu ke dumuka bikadi ya bambisi mpe nionso yankaka, samu na kumata kuna, na kuzabaka ti bawu ke na kukwendaka na lufwa. Kasi musiku ya yinza ke nata bawu, na kuzabaka ti ba mata kuna mpe ba buta bameki na dibulu, mpe kufwa. Mpe bana yina ke landa, mpe kima mosi ke vukisa bawu kintwadi kuna, mpe bawu ke kwenda na nzadi. Ya kele kuvukana! Ya kele musiku. Beno lenda ve kusala kulutila musiku ya Nzambi.

⁸⁷ Bayinsi ke—ke na kukabukaka, samu ti ntangu yina beto ke na kumonaka kele yina—yina bawu fwana kusala yayi. Beto kele na kati ya mutindu ya kusala ya matata ya bayinsi. Beto ke mona bayinsi kuzenga kimpangi. Mvula na manima ya mvula, beto ke tala yinsi *yayi* kudyama na kati ya communisme; yandi *yayi* kudyama na kati ya communisme. Mpe kaka awa na yinsi ya beto mosi, ya kele ya kufuluka na communisme, mpe yawu ke yala! Beno me mona, ya ke sala yawu, nzila kele ve samu na kusukisa yawu. Samu na yinki? Mutindu kaka ba lendaka kusukisa Titus ve. Bantu me manga Nzambi na Ndinga ya Yandi. Yinga, tata, na yawu bawu ke sala yawu, mpe beto ke mona yawu kaka na mutindu ya kusala.

⁸⁸ Munu, bantangu yankaka, mu ke bakaka bangunga zole to tatu; tii awa, mu me baka na kutala baminuti makumi tatu. Beno me mona? Kasi samu na kupesa nionso yayi, kieleka mu ke na kusalaka mbangu. Beno tanga yawu ntangu beno ke kuma na bayinzo.

⁸⁹ Beno tala, ntangu yayi kaka bawu ke na kuvukanaka. Beno ke tuba, “Mpangi Branham, ya kele kieleka?” Bawu ke na kubelamaka na Mvita ya Amakedoni; kieleka yina bawu zolaka sala. Beno me mona? Mpe bawu ke na kuvukanaka samu na yawu kaka ntangu yayi. Ya kele samu na yina beto kele na O.N.U. mpe nionso yina kele na beto. Yinza ya Wesete ke na kuvukana na kuteleinaka Yinza ya Esete, communisme mpe nionso yankaka yina, yawu nionso ke na kuvukanaka kintwadi. Mabuundu ke na kuvukanaka kintwadi. Nionso ke na kumonana mutindu kuvukana. Kuvukana, kuvukana bawu mosi kintwadi, beto ke na kumona yawu.

⁹⁰ Mpe, na yina ti kuvukana nionso yayi ya bayinsi ke na kusalamaka, bidimbu yayi, bidimbu ya bayinsi, beto ke mona kuna na yinza, kuningana ya ntoto na bisika mingi, bima ya mutindu na mutindu kuvukana; kunata yinza kintwadi, kunata bantu kintwadi, mabuundu nionso kintwadi, bima nionso yayi. Mpe na yina ti kuvukana nionso yayi ke na kukwendaka na ntwala, ya kele na kuvukana yankaka yina ke na kukwendaka na ntwala. Amen! Ya kele yina mu zola kulakisa beno ntangu yayi.

⁹¹ Nzambi ke na kuvukanaka na Kento ya Yandi ya makwela. Yandi ke na kuvukanaka, na kukatukaka Esete mpe Wesete, mpe Node mpe Sude. Ya kele na ntangu ya kuvukana, mpe yayi kele na kusalamaka kaka ntangu yayi. Samu na yinki Yandi ke na kuvukanaka? Enlevement. Amen! Nzambi ke na kukubikaka Yandi. Yinga tata, kuvukana! Yandi ke na kuvukanaka na yinki? Na Ndinga! “Samu ti mazulu mpe ntoto nionso ke luta, kasi Ndinga ya Munu ke luta ata mbala mosi ve.” Yandi ke na kuvukanaka Yandi mosi na MUTINDU YAYI ME TUBA MFUMU ata nionso yina konso denomination to muntu yankaka ke tuba. Yandi ke na kuvukanaka Yandi mosi. Yandi ke na kuyilamaka. Samu na yinki? Yandi kele Kento ya makwela. Ya kele kieleka. Mpe Yandi ke na kuvukanaka Yandi mosi na Bakala ya Yandi ya makwela, beno me mona, mpe Bakala ya makwela kele Ndinga. “Na mbatukulu vwandaka Ndinga, Ndinga vwandaka na Nzambi, mpe Ndinga vwandaka Nzambi. Mpe Ndinga vwandaka muntu mpe zingaka na kati-kati ya beto.”

⁹² Mpe Dibuundu na Kento ya makwela na Ndinga ke na kukumaka ya kulutila mosi, tii Ndinga Yawu mosi ke sala bisalu ya Bakala ya makwela. Amen! Beno me mona yawu? Kuvukana! Diaka ve, “Kwisa kota na dibuundu”; diaka ve ya *yayi*, kasi kukima nionso mpe kukangama na Yesu Klisto. Beno me mona? Ya kele ntangu ya kuvukana. Nzambi, ke na kuvukisaka Kento ya Yandi ya makwela kintwadi, ke na kuvutulaka Yawu; kaka kieleka. Ke na kuvukisaka Bampova ya nsilulu ya Yandi.

⁹³ Thessaloniciens ya Zole, na kapu ya 2; Ba me tuba, kapu yayi ya 5 me tuba, “Basantu yina kele ya kulala na mfundu-mfundu ya ntoto ke vumbuka. Mpe na manima beto ke vukana na bawu (bayina ya moyo, na bayina vwandaka ya kufwa), ke vukana ntete beto mata Kuna,” samu ti Kento ya makwela ke vwanda ya kulunga ntangu Yandi ke kwenda Kuna. Bayina kele moyo, ke na kuvukanaka bawu mosi na Ndinga, mpe bayina kwendaka ntete kusalaka yawu; mpe Yawu nionso ke vukana, ke sala kuvukana mosi ya nene ya kuvukana ntete na kumata Kuna. Amen!

⁹⁴ Communisme fwana kutelama, bima yankaka yayi fwana kutelama, mpe dibuundu fwana kuvukana yawu mosi kuna, ntangu bayayi. . . mpe bayinsi kuna samu na kusala Conseil ya Mabuundu ya Yinza ya muvimba; mpe Kento ya makwela fwana kuvukana Yandi mosi na nsi ya Ndinga ya Nzambi. Samu na kulungisa yawu, Nzambi me tinda kidimbu ya Mazulu mpe bima, samu na kulakisa na Dibuundu, mutindu Yandi salaka na yinsi. Amen.

⁹⁵ Nzambi; ntangu ya kuvukana! Yinga, tata. Oh, la la! Ntangu yayi, beno ke bambuka moyo ti, ntangu yayi, ya kele kuvukana ya Ndinga (kuvukana mbala mosi diaka), samu na kuvutula “Lukwikilu yina ba pesaka ntete na basantu.” Ya ke na kuvutukaka! Ti yayi lendaka kaka kusalama na kilumbu

yayi. Ntangu kaka yina yawu lendaka salama kele kaka ntangu yayi. Ya vwandaka ya kukangama ata mbala mosi ve na kisika yankaka; bawu me kota na bulawu ya ba-denomination. Kasi ntangu yayi, ya me tala bulawu ya denomination ve, samu ti ya kele ntangu ya kuvukana ya babakala mpe bakento ya konso yinsi, ya mpusu, ya konso ntinta, nionso na nsi ya Klisto na nzila ya Mbotika ya Mpeve-Santu mpe kuvutuka na Ndinga.

⁹⁶ Ntangu ya kuvukana ya Dibuundu! Oh, la la! Kuvukana ya konso Ndinga yina ba mwangaka bisika nionso na nzila ya ba-organisation: katuka kubanda na Nicée, na Rome, ntangu bawu kubongisaka dibuundu ya ntete, mpe bawu kubongisaka Luther, bawu kubongisaka Wesley, bawu kubongisaka nionso yankaka ya mabuundu. Mpe na kusalaka yawu, ya lungaka ti bawu kundima credo, mpe kuna ntangu Nzambi ke tinda kima yankaka, bawu zolaka yamba Yawu ve. Na yawu, ya lendaka ve kusalama tii ntangu yayi. Mpe Nzambi silaka, na bilumbu ya nsuka, ti “Lukwikilu ya batata ke vutuka diaka na Kento ya makwela,” ti ya ke vwanda na nzila yayi, mpe ya lenda vwanda na ntangu yankaka ve kana ntangu yayi. Beno tala wapi kidimbu me katuka na Mazulu, Dikunzi ya Tiya na zulu na kati-kati ya beto, mpe bidimbu na bima ya ngitukulu ya Mfumu Yesu Klisto. Mpe na yina Yandi ke na kuzonzaka na beto, ata mbala mosi ti Yawu me kondwaka konso ntangu kieleka. Amen! Na yina beto ke mona kisika beto kele ya kutelama. Ntangu ya kuvukana!

⁹⁷ Beto ke mona bayinsi kuvukana, beto ke mona yinza kuvukana, beto ke mona communisme kuvukana, beto ke mona mabuundu kuvukana; mpe beto ke mona Nzambi kuvukana Yandi mosi na Kento ya Yandi ya makwela, tii Yandi na Dibuundu kele kima mosi. Aleluya! Mutindu pyramide kuna. Kieleka! Kuvukana bawu mosi kintwadi; kuvukana ya Nzambi! Samu na yinki? Ata mbala mosi ve ntete, katuka nsungi ya ntete ya dibuundu, ti Dikunzi ya Tiya kuvwandaka ntete na kati-kati ya bantu. Ata mbala mosi ve ntete, katuka nsungi ya ntete ya dibuundu, ti bawu kumonaka ntete bima yina beto ke na kumona bubu yayi. Mpe yayi lendaka kusalama kaka ntangu Nzambi kutindaka Binieminu Sambwadi mpe me pesa beto kidimbu na nzila ya Yawu, mpe me tinda katuka Mazulu Bawanzio sambwadi; mpe me kwisa samu na kuvutula Ndinga yina ya kumwangana na kati ya ba-denomination ya bawu, mpe me kanga diaka yawu na kati ya Ndinga ya Nzambi, samu na kukulumusa Mpeve-Santu ya Yandi.

⁹⁸ Yesu tubaka, “Kana beno kele ya kukangama na Munu mpe ti Ndinga ya Munu na kati ya beno, kuna beno lomba yina beno zola, ya ke pesama na beno.” Kuvukisa diaka Kento ya makwela na Ndinga, yina kele Nzambi. Dibuundu na Ndinga, Dibuundu na credo ve, Dibuundu na Ndinga; Kento ya makwela na Ndinga ya kuvukana kintwadi. Oh, la la! Wapi. . . Kuvutula yinki? Lukwikilu ya ntete ya batata ya pentecote, beno me mona,

yina ba mwangisaka na nkonga ya bantu ya Luther. Luther yandi mosi ve; Luther ve, Wesley ve, bantu ya nene yina bandaka ve. Kasi na manima ya kukwenda ya bawu, ya vwandaka na dibuundu me telama, mpe bawu. . . yinki bawu me sala na yawu kuna, bawu me sala yawu organisation. Bawu me ndima ba-credo mpe nionso yankaka yina, mpe mutindu yina bawu me landila. Mpe beno tala bawu bubu yayi, ntangu yayi bawu me kuma na kati ya Conseil yango ya Mabuundu ya Yinza ya muvimba.

⁹⁹ Ntangu yayi, beno me mona, kasi na bilumbu ya nsuka, beno me mona, beto ke mona bima kusalama ntangu yayi yina salamaka ntete ata mbala mosi ve. Beno me mona, ya kele kidimbu ya Nzambi, mpe kuvukana nionso yayi kele kidimbu ya ntangu. Ntangu yayi, beto zola kutala yawu malembe-malembe mpe kundima kieleka ti beto me bakula yawu. Na kubikaka. . . bawu me bika Ndinga ya kieleka samu na ba-denomination; samu na kundima credo mpe mabanza ya bantu yankaka na kisika ya kubaka Ndinga.

¹⁰⁰ Apocalypse 10 ke tuba, “Nsangu ya wanzio ya sambwadi.” Ntangu yayi beno bambuka moyo, yina kele kaka na ntangu ya Bampungi Sambwadi, mpe ya kele na bawanzio sambwadi samu na kubula Bampungi Sambwadi. Beto ke kuma kuna na manima. Kasi beno bambuka moyo kisika, kieleka mbote-mbote yina Yawu ke tuba, “Wanzio ya . . .,” Mpungi ya wanzio ya sambwadi ve, kasi “Nsangu ya wanzio ya sambwadi.” Beno me mona, Mpungi ya wanzio ve, Nsangu ya wanzio! Beno me mona, wanzio sikaka kaka mpungi, wanzio yango ya sambwadi, wanzio ya Mpungi. Kasi yayi ke tuba, “Na bilumbu ya Nsangu ya wanzio ya sambwadi,” beno me mona, ntangu Nsangu ya yandi ke manisa. Beno me mona, yina kele Nsangu ya nsungi ya dibuundu. Na ntangu yayi, kuna yandi ke. . . Nsangu, Mpungi ve, mpe “kinsweki ya Nzambi (ya kele ya kusonama na kati ya Ndinga) ke lungana.”

¹⁰¹ Ntangu yayi, beno tala wapi kilumbu beto ke na kuzingaka! Beno tala Bidimbu yango, mutindu yawu kubendaka Ndinga yango ya Nzambi yina kumwanganaka, yina Luther mpe nionso ya bawu yankaka, ti ya bawu bantu ya nene yina bandaka kulandaka; kuvutukaka kaka mpe talisaka yawu na kati ya Biblia, kisika bawu vwandaka; konso muntu kaka na kisika ya yandi, yina yandi zolaka sala mpe yina zolaka salama na dibuundu; yinki yandi zolaka sala, mpe yina zolaka salama na dibuundu; bima nionso yina yandi bikaka. Mpe kuna, na kilumbu ya nsuka, na yina beto zabaka kima ve na yina me tala yawu, ba zabisaka beto na ntwala ti kima mosi ke salama; mpe mutindu mosi mikanda ya bansangu mpe bima me baka yawu, mpe me kulumuka kaka mpe me monikisa yawu mpe me kanga mansweki kintwadi. Amen! Mpangi-bakala, ya kele mbote mingi samu na munu! Yina, samu na munu, me vukisa Ndinga. Amen!

Mu ke kipe ve yina—yina, to, mu ke kipaka yina bantu ke tubaka, ke banzaka, ya kele kieleka, kasi na munu ya kele Kieleka.

¹⁰² Mutindu bantu ya ndwenga, yina katukaka na Babylone, bawu bokaka, “Wapi kisika Yandi kele, Ntinu ya Ba-juif yina me butuka? Yandi kele na zulu ya ntoto, kaka ntangu yayi. Beto fwana kutala Yandi.” Ya kele kieleka. Mpe mu ke kwikila ti Yandi me belama mingi na kukwisa ti mu lenda tuba, “Beno tala, Bakala ya makwela ke na kwisa! Mu ke kuwa lubokilu ya kati-kati ya mpimpa!” Amen! Kieleka beto kele na ntangu ya nsuka. Oh, la la, ngunga yina beto ke na kuzingaka. Beno tala. Beno me mona?

¹⁰³ Wapi kilumbu! Wapi ntangu yina beto ke na kuzingaka, ntangu kinsweki ya Nzambi me lungana; ke talisa Bunzambi, ke talisa yina Yawu kele; mutindu mwa ba-isme yayi, mpe me landila mpe me kumisa Yandi *yayi*, mpe ti muntu mosi me kumisa Yandi *yayi*, mpe muntu mosi me kumisa Yandi *yina*. Kasi Wanzio ya Mfumu me kulumuka mpe me tula na nganda nionso ya ba-isme ya bawu, mpe me basisa Kieleka na yawu, mpe me talisa Yawu. Mpe Yawu yayi, kaka mutindu ya kulunga Yawu lendaka vwanda, na nzila yankaka ve beno lenda kwenda. Yawu yayi, ya kele yina Yandi kele. Beno me mona, nkuna ya nyoka, bima nionso—nionso yayi yina vwandaka kinsweki ya kukangama na kati-kati ya bantu. Beno me mona? Yinki ya kele? Yandi vwandaka . . . Yayi kele kidimbu ke talisa yinki? Kuvukana!

¹⁰⁴ Yinki Yandi tubaka na kati ya Malachie 4? Yandi ke vutula! Kuvutula Lukwikilu ya ntete ya pentecote, kuvutula yawu na bantu na Nsangu mosi ya pentecote, na kidimbu mosi ya pentecote, na kimbangi mosi ya pentecote, na Nzambi mosi, na Ngolo mosi, na malongi mosi, na nionso mutindu mosi, na kimbangi mosi ya Dikunzi ya Tiya yina losaka Saul na ntoto, kuna na nzila ya Damas kele na kati ya beto bubu yayi, ke na kusalaka bima mosi yina Yandi salaka na kilumbu yina. Kuvukana!

¹⁰⁵ Beto ke mona bayinsi kuvukana, beto ke mona yinza kuvukana, beto ke mona mabuundu kuvukana. Beto ke mona Kento ya makwela kuvukana, kuvukana na Ndinga. Samu na yinki? Ndinga kele Nzambi. Mpe mutindu Ndinga . . . Mutindu Bakala ya makwela (kele Ndinga), mpe Kento ya makwela (kele yina ke kuwaka Ndinga), Bawu ke kwisa kintwadi na kati ya Kuvukana. Bawu ke vukana mutindu na makwela. Beno me mona, Bawu ke na kuyilamaka samu na makwela, mpe Bawu—Bawu ke kuma Mosi. Ndinga ke kuma beno, beno ke kuma Ndinga. Yesu tubaka, “Na kilumbu yina beno ke bakula yawu. Nionso Tata kele, Mu kele; mpe nionso Mu kele, beno kele; mpe nionso beno kele, Mu kele. Na kilumbu yina beno ke bakula ti Mu kele na Tata, Tata na kati ya Munu, Munu na beno, mpe beno na kati ya Munu.” Beno me mona? Na “kilumbu yina.” Na

wapi kilumbu? Na kilumbu yayi! Beto me bakula mansweki ya kubumbama ya nene ya Nzambi yina me monisama pwelele. Oh, mutindu mu zola yawu!

¹⁰⁶ Oh, beno tala mbote mutindu ba lendaka ve kufwanikisa luzabu ya yinza na kimuntu na Ndinga, mutindu ba ke salaka bubu yayi. Bawu lendaka ve kusala yawu ntangu yina. Kaka ntangu yayi ti bawu lenda kusala yawu.

¹⁰⁷ Beno tala, Yandi tubaka, “bidimbu ya mazulu, bidimbu ya mazulu.” Luzabu ya yinza na kimuntu, mpe bidimbu ya bayinsi; ntangu yayi ba ke na bidimbu ya nene na zulu bubu yayi, ba ke na ba-astronaute mpe nionso. Kasi yinki ke salaka ti ba-astronaute yayi kusala samu na yinza, kidimbu? Yawu ke pesaka bawu boma. Ba zaba ve wapi ntangu bawu ke lenda na kutinda na zulu kima mutindu yina mpe kulosa kaka ba-bombe yayi, mpe beto ke vwanda diaka ve. Beno me mona? Ntangu yayi yina kele bidimbu yina kele na bawu, bima yina ke pesaka boma na kumona na mazulu. Beno me mona? Ba kele na yawu, ba-bombe atomique mpe nionso, mitindu nionso ya bidimbu.

¹⁰⁸ Beno me mona kisika bawu tulaka kinyemo na ngwisani yayi—yayi, kilumbu yina, ti bawu ke mwangisa diaka ve ba-bombe na ntoto, kasi ntangu yayi bawu ke na kukwendaka na nsi ya masa mpe na nsi ya ntoto, kumeka yawu mutindu kaka mosi. Beno me mona? Bawu tulaka diboko na ngwisani mosi, “Beto ke sala yayi ve, kana beno tuba ti beno ke sala yawu ve (kasi beto ke vutuka na bwala mpe ke sala yawu mutindu yayi; na yina beto zaba ti beno ke na kusalaka mutindu mosi kuna).” Beno me mona? Kima kele kaka yina ve, ya kele kaka . . . ya kele na lukwikilu ve na kati-kati ya bawu, ya kele ve—ya kele ve na kima mosi. Beno lenda . . . Beno me mona? Mpe mosi na mosi kele na boma na yankaka. Yina kele kidimbu ya boma.

¹⁰⁹ Luzabu ya yinza na kimuntu mpe muntu mpe bayinsi me sala kidimbu ya boma na mazulu. Ya kieleka ya kele ya kulunga. Ntangu yayi, ba ke na boma ya mosi na mosi. Mpe ya kele kidimbu ya mazulu yina me pesama . . . Beno mona ntangu yayi, ba kele na kidimbu na mazulu mpe, kidimbu ya boma, muntu na kati ya kima ya astronaute; yina lenda vwanda na bombe atomique, mpe yina ba lenda losa mpe lenda mwangisa yinsi ya muvimba. Kumata na kati ya kima ya astronaute, mpe kuvwanda kuna. Ya kele na kima ve ke simba bawu na kusala yawu. Kieleka ba lenda sala yawu, bawu . . . konso ntangu yina bawu zola. Ba lenda kumisa yawu mfundu-mfundu kana ba zola, kasi . . . na baminuti kumi na tanu katuka ntangu yayi. Mpe yina mosi lenda sala, yankaka ke sala mutindu mosi, mpe. Na yawu, beno me mona ti bawu kele na kidimbu, kasi mutindu ya kidimbu yina ke pesa bawu boma.

¹¹⁰ Bawu ke na kuvukanaka kintwadi, ke na kutulaka kintwadi mangolo ya bawu. Yinza ya kimpwanza, ba ke na kutulaka ngolo

ya yandi kintwadi. Communisme ke na kutulaka ngolo ya bawu kintwadi na Russie. Muntu nionso; kasi mosi na mosi kele na boma na yankaka. Beno me mona, ya kele kidimbu ya boma. Ya kele kieleka. Yina kele bidimbu ya bayinsi, mpe bima.

¹¹¹ Kasi Dibuundu me kuzwa Kidimbu ya Mazulu: Astronaute! Amen! Yesu Klisto, na nzutu ya Dikunzi ya Tiya; mutindu Yandi vwandaka na Ngwisani ya Ntama, mutindu Yandi vwandaka ntangu Yandi kutanaka na Saul kuna na nzila ya Damas, Yesu mosi awa bubu yayi! Mpe yinki Yawu ke na kusalaka? Yawu ke na kunataka boma? Yawu ke na kunataka luzolo, kuvukana ya mosi na mosi. Amen! Kutala ya mosi na mosi. Yawu ke na kunataka Luzolo ya Nzambi, oh, kuvukisa beto mpe kunata beto, Nzutu ya Klisto, na kuvukana mutindu Kento ya makwela. Ya kele yina yawu ke na kusalaka ntangu yayi, kuvukana ya nene yayi yina Nzambi. . .

¹¹² Bawu ke na kuvukanaka bawu mosi, nkonga mosi *awa* samu na kunwanisa yankaka, nkonga mosi na lweka *awa* samu na kunwanisa yankaka. Awa kele ya kutelama dibuundu na kati-kati ya bawu; beno tala mbote yina ke salama, ya ke vukana na bawu. Ya kieleka ya kele ya kulunga. Kasi, ntangu yayi, beto me mona ti yawu ke nata boma mpe kuningana.

¹¹³ Kasi Dibuundu, Kento ya makwela, ke na kuvukanaka na nzila ya Nzambi mosi, na nsi ya Mpeve mosi, Mpeve ya Nzambi, na Kuvukana mosi ya santu ya Nzambi, samu na kuvwanda Kento mosi ya makwela ya santu na Nzambi. Ya kele kieleka, nionso kintwadi; kuvukana ya Nzutu. Nzutu na kuvingilaka mutindu Kento ya makwela; na yina—na yina Yawu kele Kento ya makwela, mutindu beto ke kukibokilaka Kento ya makwela. Samu ntangu ya kuvukana ya Kento ya makwela, Dibuundu kieleka ke na kuvukanaka. Yawu ke sala kaka luzolo na kati-kati ya beto, ti na mpasi beto lenda vwanda ntama na mosi na mosi. Ya kele kieleka. Ntangu beno kaka, beno ke vwanda ve na nsatu ya kusambila bantu na kusambila, beno ke vwanda ve na nsatu ya kusambila bawu na kusambila Nzambi, beno ke vwanda ve na nsatu ya kusambila bawu na kusala yina kele mbote. Bawu ke kaka na luzolo mingi na Yandi, tii kima yankaka kele ve.

¹¹⁴ Yinki beno ke banza na ntwenya ya kento, mwa ntwenya mosi ya kento ya kitoko mingi, yina ke na kwelanaka na ntwenya mosi ya bakala ya kitoko yina yandi me zola mingi, ya ke zola tuba mingi kulutila luzingu ya yandi mosi, mpe yandi zaba mbote ti ntama ve bawu ke kwelana? Na yina kilumbu yango ya makwela ke na kubelamaka, mwa ntwenya yayi, mu zonza na beno, yandi ke “vwanda kisika mosi ve.” Beno me mona? Yandi ke kubika kaka nionso; yandi ke kumipesa yandi nionso na yandi. Ya kele kieleka. Nionso yina ke sala yandi mbote, ya kele yina kaka yandi ke zola kusala. Mbote, ya zolaka vwanda mutindu ya Dibuundu bubu yayi, ti luzingu ya beto zolaka

wwanda kieleka ya kubumbana na kati ya Nzambi na nzila ya Klisto, ya kukangama na kati kuna na nzila ya Mpeve Santu.

¹¹⁵ Kima yina mu vwandaka longaka na beno awa, kele kuzonza na beno na bidimbu yayi mpe bima ya mutindu na mutindu yina ke na kusalamaka, mu me kuzwa ntangu ve samu na kusala yawu ntangu yayi; kana Mfumu zola, ya ke wwanda na kati ya nsangu yankaka. Kasi ya kele na mwa kima diaka yina ke na kukondwa na Dibuundu. Mpe beto zola yawu, kukuma na yawu, mpe mu me kuma na kisika ya yawu ntangu yayi. Beno me mona? Beto zola kukuma na yawu, kana . . . beno fwana kusala yawu. Kana beno sala yawu ve, ya kele kaka nionso, beno fwana kusala yawu. Na kutala, ntangu ya kuvukana me belama, samu ti Nzambi ke na kuvukisaka Dibuundu samu Enlevement kusalama samu na kukwenda na makwela ya Kuvukana ya Nene: ntangu Nzambi na muntu ke vukana ya Kukonda nsuka, ntangu bivangu ya ntangu ke vukana na ya Kukonda nsuka.

¹¹⁶ Yawu kusalamaka mbala mosi na nzutu ya Mwana ya muntu na zulu ya ntoto. Mpe ya lungaka ti Yandi kupesa Luzingu ya Yandi samu na kunata ngolo, samu na kuvukisa bantu yankaka na Ngolo mosi yayi, samu na Kento ya makwela ya Yesu Klisto. Mpe ntangu yayi Dibuundu ke na kuvukanaka Yandi mosi na Nzutu ya Klisto. Yandi me kuzwa Yandi mosi kimpwanza, me katukila konso mwa singa, samu Yandi kukubama; kuvukana, kuvukana na kati ya bawu; oh, luzolo mpe kiese, mpe Mpeve Santu ke na kusala na kati-kati ya bawu. Oh, la la, wapi ntangu!

¹¹⁷ Mutindu beto vwandaka me mona mabata kukubama, beto vwandaka me mona ba-oie kukubama, beto vwandaka me mona baniamama . . . baniosi kukubama, beto vwandaka me mona matuti kuyilama samu na mvula, beto vwandaka me mona nionso; mutindu yawu ke na kuvukanaka yawu mosi kintwadi, samu na kubenda ya yawu ya nene. Beto me mona Kuvukana ya Bayinsi, ya bayinsi kintwadi, kuvukana bawu mosi na communisme. Beto me mona bawu kuvukana bawu mosi awa na Yinza ya Weste. Beto me mona dibuundu kuvukana yawu mosi kintwadi, nionso yankaka yayi. Na yawu kieleka ya lenda wwanda ve, na ntangu yankaka ve ti ya zolaka wwanda mutindu yayi; ya zolaka wwanda mutindu yayi ve na bamvula makumi zole me luta, ya zolaka wwanda mutindu yayi ve. Ya zolaka wwanda mutindu yayi ve bamvula kumi me luta, ya fwana wwanda kaka ntangu yayi. Beno me mona, samu ti ba-isme mpe bima yayi kwisaka ve na kisika yayi.

¹¹⁸ Ntangu yayi beno vumbuka! Beno kukiningisa, na nswalu nionso, mpe beno tala na nganda awa kisika beto kele! Wapi beto kele? Mutindu bantu ya ndwenga yina, kieleka beto kele na kati ya ndonga na Ndinga ya Yandi, mpe Nsemo ya Mfumu ke na kungenga na zulu ya nzila ya beto. Nkembo wwanda na Nzambi na Mazulu. Mpe Nkembo wwanda na Nzambi Yina me pesa beto Yesu Klisto, Yina beto ke zolaka, mpe me nata beto kisika yayi.

Mpe na yina beto . . . Beto kele bantu ya Yandi, yina futamaka na ntalu ya Menga ya Yandi.

¹¹⁹ Oh, la la! Ntangu ke kwisa ntangu ya kuvukana, beto ke mona, mutindu beto ke vukana mosi na mosi na kati ya basinga ya Mpeve ya Yandi, beto . . . Ya lenda vwanda Mpeve ya Yandi? Kieleka, Ya kele Mpeve ya Yandi. Samu na yinki Ya kele? Ya kele Ndinga ya Yandi, mpe Yandi kele . . . yina kele Mpeve ya Ndinga. Mpe ntangu Mpeve yango ya Nsilulu ke kwisa na zulu ya beno mpe ke siamisa mpe ke talisa Yawu mosi kaka awa, Ya kele Mpeve mosi? Ya vwandaka Yina vwandaka na Moise na ntoto ya kuyuma! Ya vwandaka Yina vwandaka na zulu ya Yesu Klisto! Yandi kele Yina kutanaka na Saul na nzila ya Damas! Yandi kele mutindu mosi mazono, bubu yayi, mpe kukonda nsuka! Mpe Yandi ke na kusalaka kima mosi!

¹²⁰ Mpe beto ke mona bayinsi kintwadi, beto ke mona bamfumu ya dibuundu kintwadi, beto ke mona communisme kintwadi, beto ke mona ba-isme kuvukana, beto ke mona bima nionso yayi; mpe ntangu yayi beto ke na kumona Kento ya makwela kuvukana na Ndinga. Oh, la la! Ya kele ntangu yina basantu ke telema samu na kuvukana na bayina kele zinga, samu na kwenda kuvukana na Yesu Klisto Kukonda nsuka.

¹²¹ Bika ti Nzambi kusadisa beto, mosi na mosi, na kuvukana na Klisto na nkokila yayi, beto ke pesa nionso yina beto kele, nionso yina kele na beto, moyo ya beto nionso, nzutu, mpe dibanza, na Yesu Klisto, mpe kutala na ntangu ya kuvukana yango.

Ntangu mpungi ya Nzambi ke wakana, ti
ntangu kele diaka ve,
Mpe suka ya Seko ke tana, ke ngenga mpe
kitoko;
Ntangu bafwa na Klisto ke vumbuka mpe ke
vukana kuna na simu yankaka (na Kento ya
makwela yina kele zinga), samu ti ba baka
bawu kintwadi.

¹²² Beno tala kuvukana! Nzambi ke na kuvukisaka Dibuundu na Ndinga ya Yandi, Ndinga na Dibuundu, samu ti bawu zole kukuma mosi, “Tuba *yayi*, mpe ya ke salama. Sala *yayi*, mpe ya ke salama. Ya kele yina; yayi kele Munu na ntwala ya nge, yayi kele Munu yina ke na kusiamisaka yawu; yayi kele Munu na nge.” Mbote.

¹²³ Beto ke mona ti awa ntangu ke na kwisa ntangu Mpungi ke wakana, mpe basantu yina kele ya kulala kuna, ba lenda vwanda ve ya kulunga kukondwa beto; bawu ke na kutala na beto (Hebreux 11); mpe ntangu bawu ke vukana, bawu ke vukana na bayina ya moyo. Dibuundu ke vukana na Ndinga, kuna Dibuundu mpe Ndinga ke vukana kintwadi, ke kuma mosi. Basantu ya kufwa na basantu ya moyo ke vukana kintwadi samu na kuvwanda mosi; mpe nionso ke na kwenda kintwadi samu

na kuvukana na Klisto kuna, samu na Kudya ya Makwela ya Mwana-dimeme.

124 Ya kele ntangu ya kuvukana, mpe bidimbu ke na kupepaka bisika nionso. Bidimbu kele na kati ya bayinsi, bidimbu kele na kati ya communisme, bidimbu na kati ya Yinza ya Weste, bidimbu na kati ya Conseil ya Mabuundu. Mpe Kidimbu kele awa na nkokila yayi na kisalu ya Mpeve Santu, mpe Ndinga ya Nzambi ke na kusiamisaka yawu mpe ke sala yawu Kieleka. Amen! Ntangu ya kuvukana! Kidimbu ya Ntangu ya Kuvukana!

Beto kulumusa bayintu ya beto.

125 Mfumu Yesu, mutindu ntima ya munu ya mputu ke na kudumukaka na kiese, na yina mu ke na kumona balenda ya munu, bakala ya bamvula mingi, kasi diaka, balenda ya munu na kumona Nge kukwisa na kati ya nsungi yayi; kuvwanda moyo mpe kutelama awa, mpe kumona ntangu Mpungi yango ke wakana, “Yandi yina kele mvindu, yandi kukuma diaka mvindu. Yandi yina kele muntu ya mbote, yandi kukuma diaka mbote. Yandi yina kele santu, yandi kukisantisa diaka.” O Mfumu Nzambi!

126 Mpe na kubanza na beto ya kutelama, na ntangu yina, na kukanga ya disu, ntangu yinza ke zaba ve yina ke na kusalamaka, kasi na mbala mosi, beno ke mona na ntwala ya beno, ya beno ya luzolo yina kufwaka, kukwisa kuvukana na beno diaka. Mpe beto ke soba na ntangu yina, na kukanga ya disu; mpe kukwenda na zulu, kintwadi, samu na kukutana na Mfumu ya beto na zulu. Mpe kuna kuvukana na Yandi, kuvwanda kuna ntangu nionso, mpe kuvwanda ata mbala mosi diaka ve na nganda ya Mvwandulu ya Yandi.

127 Wapi kima ya nene ya kele bubu yayi, Mfumu, na kuzaba ti ntangu yayi beto me vukana na Mpeve mosi. Mpeve mosi, Mpeve-Santu, yina ke na Ndinga na diboko ya Yandi, me kwisa na beto. Mpe wapi kima ya nene ya kele, mutindu ya ke mbote na kakatula beto na nionso ya yinza, samu na kuvukana beto mosi na Yesu Klisto. Mpe na kubanza ti kilumbu mosi, na mutindu ya muntu, na nzutu mutindu nzutu ya Yandi Mosi ya nkembo, ti beto ke vwanda na mesa ya Madia ya Makwela mpe kuna kuvukana mpe ke kwelana na Yandi; samu na kuzinga mutindu Kento ya makwela na Bakala ya makwela bantangu nionso yina ke kwisa, Seko nionso.

128 Mfumu Nzambi, bika ti yayi kuvwanda kaka ve dibanza ya luvunu na bantu, kasi bika ti ya kuma kieleka na mutindu ti nsatu mosi mpe mpwila kuvwanda na bantu ti bawu...na kutangaka mukanda ya bansangu ya bawu, kutala na zulu... na kuwaka ladio mpe bansangu, mpe bawu kumona ti ya kele ntangu ya kuvukana. Bidimbu ke na kupela.

129 Mfumu Nzambi, mutindu beto me zonzila na bakento, yinki bawu ke sala na bilumbu ya nsuka; yinki dibuundu ke sala na

bilumbu ya nsuka; mpe yinki ke vwanda Bansungi ya Dibuundu, mpe yinki ke vwanda Bidimbu, bima nionso yankaka yayi. Mpe beto me mona mutindu ya vwandaka, na bilumbu ya Noe. Beto me mona mutindu ya vwandaka, na bilumbu ya Sodome na Lot, ntangu Wanzio ya Nzambi kuzabanaka Yandi mosi na nsuni ya muntu, yina kudiaka nsuni ya ngombe mpe kunwaka miliki ya ngombe, mpe yina kudiaka dimpa; mpe yina vwandaka kuna mpe yina lendaka na kutuba yina vwandaka salama na manima ya Yandi. Mpe Yesu tubaka ti kima mutindu mosi ke salama na kwizulu ya Mwana ya muntu.

¹³⁰ Mfumu Nzambi, beto me mona pyramide, mutindu ba tungaka yawu na zulu kuna, mpe kumona mutindu beto me bwela bima yayi na yawu; mpe beto me bakula ti beto kele na nsuka ya ntangu, ke na kuingila Mfumu ya Ditadi ya nsongi. Nkembo na Nzambi! Beto ke sambila, Tata, ti Nge ke vumbula bantu, na nswalu ntangu yayi, mpe ke vukisa beto kintwadi, na zola ya busantu mpe luzitu na Yesu Klisto mpe na mosi na mosi.

¹³¹ Kana ya kele na bayina awa na nkokila yayi yina kele na kivuvu yina ve na bawu, beno zola kutelemisa diboko ya beno na Nzambi mpe kutuba, “Mfumu Nzambi, vukisa munu na Nge, vukisa munu na Nge”? Nzambi kusakumuna nge, mpangibakala. Nzambi kusakumuna nge, mpe nge, nge; yinga. “Vukisa munu na Nge, Mfumu.” Yinga! Oh, la la!

Bayinsi ke na kukabwana, Israel ke na
kuvumbukaka,

¹³² Beno tala Israel kuna, kuvukana kintwadi. Israel, bisika nionso na yinza, me kwisa na kuvukana bawu mosi; samu na kuvukana bawu mosi mpe ntangu yayi bawu kele yinsi. Bawu kele yinsi ya kuvukana: na drapeau ya bawu mosi, mbongo ya bawu mosi, makesa ya bawu mosi, nionso; kana bawu vwandaka ntete yawu ve, bawu kele yawu ntangu yayi. Israel ya kuvukana, Rome kele ya kuvukana, dibuundu kele ya kuvukana. Mpe Kento ya makwela ke na kuvukanaka, amen; mpe kwizulu ya Kuvukana yango ya Nene. Yinki ya kele? Nionso ke na kwendaka na Kidimbu yango, na Kidimbu ya nene ya mfunu yayi, Yesu na Kento ya Yandi ya makwela ke na kuvukanaka mutindu mosi.

¹³³ Tata Nzambi, pesa masakumunu yayi yina mu me lomba samu na bantu yayi, mpe ti beto kuvwanda ya kuvukana na Nge na ntima mpe mpeve, na yina bawu me telemisa maboko ya bawu, na kusosaka yawu. Mfumu Nzambi, sukula beto mpe sala beto ya Nge; pesa yawu, Mfumu. Ya kele nionso yina beto zaba mpe yina beto lenda sala, ya kele kulomba. Mpe kuna Nge tubaka kana beto lomba yawu mpe kwikila yawu, beto ke kuzwa yawu; mu ke na kusosaka yawu, Mfumu. Mu me tonda Nge na Nkumbu ya Yesu Klisto. Amen.

Mu zola Yandi, mu zola Yandi,
 Samu Yandi zolaka munu ntete,
 Mpe futaka mpulusu ya munu
 Na yinti ya Calvaire. (Amen. Oh, la la!)

Tala, Bakala ya makwela ke na kwisa!
 Mu ke kuwa lubokilu ya kati-kati ya mpimpa!
 Beto ke mata na miloolo, kana beto nionso
 simbidila,
 Mpe kukutana na Yandi na zulu.

Kyelola meso mpe sambila, mpangi ya munu ya
 bakala,
 Na boma ti muntu yankaka kubaka yimpu-
 mfumu ya nge,
 Samu ti ya kulemba mpe yina me vutuka
 manima
 Ke lwata ve dizwela ya makwela.

¹³⁴ Ya kele kieleka. Bika ti beto vwanda ya kuyilama samu na lubokilu ya kati-kati ya mpimpa yayi. Ya ke salama na ngunga yina beno ke banza ve. Ya ke vwanda na lubokilu, na kati-kati ya yinza ya ntembe ve; ya ke vwanda kinsweki. Kasi mikwikidi, yina ke na sosaka yayi: Beno ke mona bambwetete kukwisa na ndonga? Beno me mona? Yinki yawu me basisa? Kieleka kaka mutindu ya salaka mbala ya ntete. Beno me mona, beto bawu yayi, bidimbu ke na kwisa.

Beto ke mona bidimbu kumonana samu na
 Kwizulu ya Yandi ya lusakumunu,
 Beno tala, matiti ya yinti ya figi ntangu yayi
 kukuma na ntinta ya saka-saka;
 Nsangu ya mbote ya Kimfumu me kwenda na
 bayinsi nionso;
 Mpe beto me belama, nsuka lenda monana.

Kuna na kiese, beto ke kwenda, mwangisa
 Nsangu ya kumonana ya Yandi ya
 lusakumunu,

¹³⁵ Ya kele kieleka? Oh, kumwangisa Nsangu ya kumonana ya Yandi ya lusakumunu! Ya kele yina beto fwana kusala. Kutuba na muntu nionso, "Yilama, kubama na kukutana na Nzambi." Amen! Mu zola Yandi. Oh, mutindu mu zola Yandi. Ntangu yayi, bika beto kutelama ntangu yayi. Na yina beto ke pesana mbote mosi na mosi, beno baluka mpe beno pesa mbote na muntu, mpe kutuba:

Tii beto ke kutana! (Beno pesana mbote,
 ntangu yayi.) . . . tii beto ke kutana!
 Tii beto ke kutana na makulu ya Yesu;
 Tii beto . . .

Beno bambuka moyo ti, ba lenda bokila beno. Lukutakanu ya beto yankaka lendaka vwanda na makulu ya Yandi.

Oh, Nzambi kuvwanda na beno tii beto ke kutana diaka!

¹³⁶ Ntangu yayi, beno banza kaka, ntete beto ke kutana diaka; ntete beto kutana na Lumingu na suka, to na Kilumbu ya tatu na nkokila, ya lenda vwanda ti. . . kima ya ntete beno zaba, muntu mosi kele ve. Ti kingandi kele ve, mpe ti bawu me kwenda. Oh, ti na kubanza na bakala ya nge yina kele ve, to kento ya nge yina kele ve, mpe—mpe kento ya John yina kele ve, mpe—mpe—mpe awa bana kele ve. Nionso me salama (yinki me salama?), na yawu beno me bikala na manima!

Oh, kaka kudila mpe kwetisa meso ntangu bantu ya kuzimbana ke kuzwa kitumbu ya bawu,

Bawu me dila na matadi mpe na myongo, (Mutindu Israel, ntangu bawu kuvutukaka na mbanza, na tempelo.)

Bawu kusambilaka kasi bisambu ya bawu kusalamaka na manima ya ntangu. (Bawu mangaka Nsangu.)

¹³⁷ Oh, mpangi-bakala, beno sala yawu ata mbala mosi ve. Nionso yina beno ke sala, beno kwikama na dyambu! Yinga, tata!

¹³⁸ Ntangu yayi, tii beto ke kutana, beto ke sala yayi:

Baka Nkumbu ya Yesu na nge,
Mutindu kisengo ya nkebolo nzutu;
Ntangu bantontolo ke kumaka, (Yinki beno ke salaka?)

Niunguta Nkumbu yango ya santu na kisambu.

Nkumbu ya ntalu, Oh yawu kele mbote!

Kivuvu ya ntoto mpe kiese ya Mazulu;

Nkumbu ya ntalu, Oh yawu kelete!

Kivuvu ya ntoto mpe kiese ya Mazulu.

¹³⁹ Beto kulumusa bayintu ya beto ntangu yayi, na ntangu beto ke yimbila na kati ya yinwa:

Beto ke kulumusa bayintu na Nkumbu ya Yesu,
Beto ke fukama na makulu ya Yandi,
Ntinu ya bantinu. . . ke byadisa Yandi,
Na nsuka ya nzietelo. (Ya ke vwanda mutindu yina, kilumbu mosi.)

Oh Nkumbu ya ntalu, Nkumbu ya ntalu, Oh yawu kele mbote!

Tii beto ke kutana diaka, Nzambi vwanda na beto.

Kivuvu ya ntoto mpe kiese ya Mazulu;
Nkumbu ya ntalu, Oh yawu kele mbote! Yawu
kele mbote!
Kivuvu ya ntoto mpe kiese ya Mazulu.



NTANGU YA KUVUKANA MPE KIDIMBU YA YAWU KNG63-0818

(The Uniting Time And Sign)

Nsangu yayi ya Mpangi William Marrion Branham, kulongamaka na Kingelesi, na nokola ya Lumingu na kilumbu ya 18 ya Ngonda ya nana, na mvula 1963, na Branham Tabernacle na Jeffersonville, Indiana, U.S.A., yina bakamaka na bande manietiki mpe basisamaka na muvimba nionso na buku na Kingelesi. Lubangulu yayi na Kikongo basisamaka na buku mpe ba kabulaka yawu na Voice Of God Recordings.

KIKONGO-KITUBA

©2020 VGR, ALL RIGHTS RESERVED

VOICE OF GOD RECORDINGS

P.O. BOX 950, JEFFERSONVILLE, INDIANA 47131 U.S.A.

www.branham.org

Luzabusu samu na kubasisa mikanda

Muswa nionso kele ya yandi. Muntu nionso lenda kubasisa buku yayi na masini ya yandi ya yinzo samu na yandi mosi, to kukabula yawu ya mpamba, mutindu kidadilu samu na kumwangisa Nsangu ya mbote ya Yesu Klisto. Ba lenda tekisa buku yayi ve, kubasisa yawu na lutangu ya kulutila mingi, kutula yawu na site internet, kubumbisa yawu na kibumbulu ya bansangu, kubangula yawu na bandinga yankaka, to kulomba mbongo kukondwa muswa yina me sonama na Voice Of God Recordings®.

Na yina me tadila bansangu ya kulutila mingi to samu na yina me tadila bisadulu, beno sonikila:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org